
DARNISEEA





حاراه عارف

# مصطفىمحمود

# الشيخانيسان كالنانيان كالمالية المالية المالية

الطبعة الخامسة



प्राण्डी किंद्री श्री श्रिक्षां

# شخصيات المسرحية

الشيخ إبراهيم طنطاوى : رجل صوفى فى الأربعين

سونيا : ممثلة إغراء مشهورة وصاحبة فرقة مسرحية

دراويش ومريدين للشيخ طنطاوى

راقصات في فرقة سونيا المسرحية

إدريس

إسماعيل

أحمد

بحيى

عیسی

ماريكا

نانا

زازا

فاني

راشيل

توتو : مخرج فرقة سونيا

جيمى الفونت: مصمم الرقصات

جدو: المدير المالى للفرقة

أونكل : المدير الفني للفرقة

سوسو راقصان في الفرقة بوسو

# القصهلالأول

(صحواء جوداء . . لا ترى شجرة على مدى الرؤية . . تلال من الرمل . . أعشاب من الشوك والحسك والصبار . . كوخ من الحطب الجاف والصفيح والخرق القديمة . . ثم لا شيء .

الوقت نهار والشمس تلهب الرمال.

على البعد صوت عربة . . يتوقف الصوت . . نسمع صوت مارش يدار عدة مرات دون جدوى . . صوت المارش من جديد . . ثم لا حركة . . صوت باب العربة يصفق . . ثم صوت وقع أقدام تتبختر على الحصى . . تدخل امرأة فى الثلاثين فى ثياب صيف مودرن . . مينى جيب يكشف عن ساقين مثل قعين سكر . . وبوت فضى . . بلوزة ذات ألوان ملفتة . . باروكة ذهبية . . خدان حمراوان من لسع الشمس . . فى يدها نظارة تلوح بها وهى تتبختر . . تتلفت حولها كأنما تبحث عن شىء .

تتجه إلى الكوخ.. تقف أمامه.. تتردد قليلاً.. ثم تدق بنظارتها على الصفيح.. لا أحد يرد.. تتشجع أكثر فتدق بيدها).

- يا أهل الله
- صوت من الداخل) مين

(يخرج رجل في الأربعين في يده سبحة وفي عنقه سبحة أخرى طويلة . . ثيابه تدل على أنه من الصوفيين المنقطعين للعبادة . . نظراته زائغة . . يفاجأ بمنظر المرأة على الباب فيرتد خطوة ثم يغض بصره وينظر إلى الأرض) .

- أستغفر الله . . إنت مين ؟
- أنا ف ورطة يا عم انجادني .
  - ورطة إيه يا ست ؟
- العربية عطلت منى ووقفت فى عرض الطريق . . اعمل معروف شوف لى ميكانيكى . . حابات فى الخلا فى وسط الديبه إن ما عرفتش اطلع بالعربية من الصحرا المخروبة دى . . أرجوك ساعدنى . . إنده على واحد ميكانيكى أو دلنى على جراج
- میکانیکی إیه وجراج إیه وعربیة إیه . . هی دی سکه بتمشی فیها عربیات . . ده انتی فی حته مقطوعة . . صحرا علی مدی الشوف . . مفیش مخلوق ولا دکان ولا شجرة ولا عود أخضر ولا صریخ بن یومین . . ثم فهمینی . . إنتی إزای دخلتی بعربیتك هنا . . ومفیش طریق مرصوف .
- قالو لى دى سكة الشيخ إبراهيم طنطاوى ووصفوا لى الطريق المهبب ده .

- وعاوزه إيه من الشيخ إبراهيم طنطاوى .
- إنت تعرفه . . أرجوك دلني عليه . . خدنى على بيته . . ده أنا بدور عليه طول عمرى . . دنا دايخه عليه . . جيت له من آخر الدنيا . . نفسى أشوفه مرة واحدة وأموت . . قالو لى إنه بيقرا الكف ويضرب الرمل ويفتح الفنجان ويعرف المستخبى ويشوف البخت ويفك الأعمال ويحل ألعقدة إللى مالهاش حلال .
  - أنا هو الشيخ إبراهيم طنطاوى.
     (تنظر إليه في دهشة وقد عقدت لسانها المفاجأة)
    - إنت . . هو . .

(تتحسسه كأنما لا تصدق . . ثم فجأة تقفز على صدره وتتعلق برقبته) .

- إنت الراجل اللي بحلم بيه . . إنت أملى . . إنت حياتى . . (ينتزع يديها عن حول رقبته في عنف)
  - إيه يا ولية الجنان ده . . نقضت وضوى . . الله يكسفك . . أعوذ بالله السميع العليم من كل شيطان رجيم . . أعوذ بالله من غضب الله .

(هي ما زالت واقفة ذاهلة مفتوحة الفم في حالة فرح حيواني . . ولا تلبث أن تعود فتقفز عليه وتتعلق برقبته وصدره وتحتضنه وهي تهتف في طفولة ) :

- إنت هو الشيخ طنطاوى بلحمه ودمه . . اقرصني في ودنى عشان أتأكد إنى مش بحلم .
- إيه يا ولية شغل الجنان ده . . إيه اللي بتعمليه ده . . يا وليه ابعدى عنى أنا في عرضك .
- (يحاول أن يتخلص منها فلا تفلته وكلمـا استغفر أكثر شددت عليه ذراعيها أكثر) .
- أستغفر الله العظيم من كل ذنب عظيم . . يا منجى من البلاء يا رب . . يا مفرج الكروب . . يا ولية سيبيني في حالى . .
- إنت الولى صاحب الكرامات والفتوحات.. إنت صاحب الحجاب الجلاب اللى يشعلل نار الأحباب.. ويستجمع الشيخ كل قوته ثم يدفعها بعيدًا في عنف هاتفًا وقد نفد صبره):
- يا ولية حلى عن وشي . . أنا لا ولى ولا صاحب كرامات . . ولا صاحب فتوحات ولا بضرب رمل ولا بفتح فنجان ولا أعرف مستخبى ولا أشوف بخت . . . أنا راجل غلبان على باب الله . . ابعدى عنى .
  - بالضبط.. هوّ ده إللي قالوه.
    - هو إيه اللي قالوه ده.

- قالوا حاینکر إنه شیخ مبروك وحایقول إنه راجل غلبان علی باب الله . . وقالوا لی إوعی تصدقیه . . دی هی دی طریقة الأولیا المبروكین . . تواضع المهنة . . مش كده (في رقة) یا مولانا .

(تفترب مند فى إغراء وتهم بالقفز على رقبته مرة أخوى . . ولكنه فى هذه المرة بخطف عكازًا غليظًا من على باب كوخه ويلوح به فى وجهها مهددًا) :

- إياكى تقربى منى يا ولية . . خطوة واحدة وحانزل بالشمروخ ده على دماغك أدشدشه . (تتراجع خالفة)

- يا لهوى .
- ثم أنا مش فاهم . . إيه التهجم ده . . واحدة ما عرفلهاش اسم ولا رسم تتهجم على . . وتخش بيتى .
  - بيتك . . بتسمى المزبلة دى بيت .
- مزبلة . . هو صحيح مزبلة . . لكن أحسن من المبولة إللي سيادتك ساكنه فيها .
- مبولة . . أنا ساكنه فى مبولة . . إنت تعرف أنا مين . .
   إنت تعرف إنت بتكلم مين بالألفاظ دى .
  - إذا لم تخنى الذاكرة فأنا أمام الست سونيا.

- رائع . . مدهش . . أول كرامة لك يا سيدنا الشيخ .
- ولا كرامة ولا حاجة . . صور سيادتك منتشرة ع الحيطان فى كل مكان . . أفيشات متر فى عشرين متر من هنا لبنها . . بشوفها غصب عنى على دكان الحلاوة الطحينية لما أنزل أشترى تموين الزيت والسكركل ست أشهر . . مع فرق بسيط . . إن الصورة هناك عريانة . .
- کده . . تبقی عرفت مین اللی بتکلمها . . وانها مش ساکنه فی مبولة . . وإنما فی قصر ملکی علی النیل .
   فی مبولة شعبیة وحیاتك بیعدی علیها الزباین آخر اللیل
  - ی مبوله شعبیه وحیات بیعهای عبیها الربا تربیحوا .

### (تهم بضربه ولكنه يلوح بعصاه).

- سافل . . (ثم تغير لهجتها فجأة إلى نبرة أفعوانية خبيثة) . . ع العموم إنت اعترفت من لحظة إنك كنت بتبحلق في صورى العريانة في الحيطان زى الرجالة إياهم زباين المبولة . . كل الفرق إنك مش لاقى غيرالصورة . . ومش طايل النسخة الأصلية يا شيخ يا خباص .
- الحمد لله إللى شفتينى على حقيقتى وعرفتى إنى شيخ خباص ، وعرفتى إنك غلطانة وإن مفيش هنا حد مبروك

ولا صاحب كرامات ولا صاحب فتوحات . . أظن بقى كل واحد منا يتطرق لحال سبيله . . (يستدير داخلاً إلى كوخه) عن إذنك . . سلام عليكم .

- رتمسك به من ظهره وتشده) إيه رايح فين . . تعال هنا يا شيخ يا شيخ يا خياص . . ما دمت سافل زيى حاتهرب منى ليه ؟

- رمستمرًا فی دخوله دون أن بلتفت إليها) ومين قال إنی سافل و ريك . . أنا سافل صحيح لكن مش زيك . . أمثالك من السفلة هم سلطان والغرباوی والتابعی وأبو حلموس مختره من ه

وغيرهم وغيرهم.

- آه . . وعرفت أسامي عشاقي الخصوصيين كان . . أظن حاتقول قريت أساميهم ع الحيطان وفي دكان الحلاوة الطحينية إياه إللي بتاخد منه تموين الزيت والسكر . مدد يا شيخ طنطاوي . . أبو حلموس ما عرفتوش إلا امبارح ومفيش حد يعرف بعلاقتنا غير ربنا . . دي كرامة . . ده انت ولي بصحيح . . مدد يا سيدي إبراهيم يا طنطاوي . (الشيخ ما زال يعطيها ظهره ويصر على الدخول في حين هي تتشبت به وتولول وتخر راكعة عند قدميه) .

- إنت قطب الزمان بعينه . . سامحني يا مولانا . . اعف عني . . . اصفح عني . . . أبوس رجلك . . ما تسيبنيش

- أرجوك . .
- (يستدير الشيخ إليها ويرفعها بعنف من الأرض).
- قومى يا ولية كفاية مسخرة . . إنتى عاوزه منى إيه . . مش مكفيك مليون مكفيك الرجالة إللى حواليكى . . مش مكفيك مليون مغفل بيصقفوا لك . . ومليون ترانزيستور بيهتف باسمك .
- صحيح مليون مغفل بيتمنوا كلمة من شفايني . . لمسة من إيدى . . إشارة بصباعي . . صورة عريانه عليها توقيعي الشريف . . صحيح أنا عندى المال والشهرة والدنيا . . لكن نفسي أملك المستقبل . . نفسي أملك مفاتيح الغيب . . ولو مفتاح واحد من المفاتيح إللي عندك .
  - مفاتيح الغيب عند الفتاح.
- حاعرض عليك صفقة مغرية . . حأديك حلم المليون معجب حلال بلال بين أحضانك (تفتح فراعيها وتمد شفتيها وتتحسس صدرها لتروج البضاعة) وتديني مفتاح واحد من مفاتيحك .
  - أبيع الذهب بسعر التراب.
  - جسمی ده تراب . . بص کویس . . فتح عینیك .
    - جيفة .
- اللس الجيفة (تأخذ يده وتمررها على خدها ورقبتها وصدرها . . يترك

يده في لا مبالاة واضحة . . ثم يحاول أن ينزعها فجأة كأنما لدغته أفعى) .

إيه خفت ليه . إنت بتحط إيدك كطبيب للتشخيص . . هو الطبيب بيزنى لما بيكشف ع اللحم العريان . . إيه رأيك فى الملمس رأيك فى الليونة والطراوة دى . . إيه رأيك فى الملمس الرطب المنعش . . شم الجيفة إللى بتقول عليها . . شم سحابة البارفان إللى طالعة مع كل نفس باتنفسه . . شم يا شيخ يا مغفل .

(الشيخ يدفعها فجأة بيده فتكاد تقع على الأرض).

- ابعدي عني يا ولية .
- آی . . کسرت لی رجلی . . إنت إیه . . اتجننت .
- أعوذ بالله السميع العليم من كل شيطان رجيم . . أستغفرك يا رب وأتوب إليك .
- أحلف بإيه إن الصفقة حليت فى عينك وطيرت لك عقلك . . (تضحك في إغراء) أنا عاذراك الصفقة دسمة ومغرية جدًّا . . . عصفور فى البد يا سيدنا الشيخ ولا عشر حوريات فى الجنة .
- (ف جنون وهو یسحب علیها عصاته) انجری من قدامی یا ولیة . .
   مش عاوز أشوف خلقتك قدامی لحظة واحدة .

- (تمثل علیه) یا دهوتی . . هربت دمی . . قلبی وقف . . آی . . شوف نبضی . . عندی سکته . . الدنیا بتلف بی . . الحقنی بشربه میه .
- (یجری الشیخ بسداجة إلى زیر بجوار الکوخ ویملأکوزًا من الصفیح بالماء ویعود به).
- (تضع الكوز على فها ثم تبصق) إيه القرف إللى بتشرب منه ده . . دى بلهارسيا وانكلستوما وملح إنجليزى وزيت خروع ومية مجارى . . إف أعوذ بالله . . إزاى بتشرب من كوكتيل البلاوى ده .
  - (الشيخ مبهوتا) ده زير طاهريا ولية.
    - طاهر إيه يا شيخ . .

إيه رأيك أجيب لك م العربيه مشروبات . . قصدى مشروبات طاهرة برده . . ينسون مثلج . . وعرقسوس . . وكروية . . وحلبة . . مشروبات شرعية كلها على ضمانتى نشرب لنا كاسين في ساعة العصارى الحلوة دى ونفكر في الصفقة . . صدقنى الصفقة دى مهمة جدًّا وما يصحش تبت فيها بسرعة . . نص دقيقة وأرجع لك . . استنانى .

(تنفلت مسرعة وتختفي من المسرح).

(على حين نرى الشيخ يخرراكعًا وبحسو على وجهه النتراب مستغفرًا باكيًا فى

- ربی . . مولای . . إلهی . . ملکی . . منقذی . . عظصی . . سندی . . قوتی . . صخرتی فی الأمور الشداد . . اصرف عنی البلاء ونجنی من الشیطان الرجیم . . اغفر لی خطیئاتی . . إلهی . . ملکی . . معبودی .

(صوت سونیا من بعید)

- بتنادی علی یا شیخ طنطاوی
  - اسكتى يا ولية .
- هم كمان بينادونى : يا معبودى يا مليكتى يا مولاتى .
  - هم مين يا ولية ؟
    - المريدين.
- الشياطين . . الكلاب . . ارجعى لهم . . إنتى منهم . . مش عاوز أشوف وشك هنا أبدًا . . (ساقطًا على وجهه من جديد يستغفى . . مولاى اصفح عنى . . إلهي . . اغفر لى خطيئاتى .
  - أنا جايه حالا يا حبيبي ما تعيطش.. قطعت قلبي.

(نراها داخلة المسرح في مايوه عليه ثوب بلاج وتحمل في يدها شمسية بلاج وكراسي وصندوق مرطبات).

(الرجل الصوف ينظر إليها وقد فغر فاه . . في حين هي تبدأ في فرد الشمسية وتنبيتها . . في سرعة دون أن تلتفت إليه . . تضع الكرميين ثم مائدة من القهاش . . ثم تفتح الصندوق وتخرج زجاجتين من الهم هندي . . تسرع إليه بواحدة) .

- تمر هندی وحیاتك . . جلاب میه فی المیه ولا نقطة سبرتو . . اشرب وادعیلی . . ایه مالك واقف مكشر كده زی بومه فی خرابه .
- أنا مش عاوز أشرب ومش عاوز أشوف وشك هنا وإن
   ما غورتيش فى ستين داهية أنا حاكسر المولد اللى عملتيه
   ده كله .
- طيب اهدا بس اهدا . . صبرك بالله . . الحلم سيد الأخلاق . . اقعد لحظة نتكلم . . نتفاهم . . خد شفطة من التمر هندى برد قلبك . . ليه التزمت السخيف ده . . ليه تنفرنى من الصلاح بالحشونة والغلظة دى . . ليه ما تكسبنيش لصف التوبة بالإنسانية والمودة . . صدقنى أنا زهقت م الهلس ونفسى أرجع لحظيرة الفضيلة . . لكن مش بالأسلوب المنفر ده .

(يجلس منهالكًا . . ثم يغمغم مشيرًا إلى لحمها الظاهر من ثوب البلاج) .

- ترجعي لحظيرة الفضيلة بالـ.. مايوه.. إزاي..
- خطوة خطوة يا حبيبي . . مش معقول حاتخدنا للتوب

الشرعى دفعة واحدة . : والامش حاتلاقى حد يمشى وراك . . الدنيا اتغيرت . . وانت عايش فى القرن العشرين .

- وأنا مالى يا ستى ومال القرن العشرين . . أنا سبت لكو القرن العشرين . . وجيت أعيش هنا لوحدى في القرن الهجرى . واللي عاوزني يجيني هنا في القرن الهجرى . مش معقول يا سيدنا الشيخ ده مشوار طويل علينا خطوة خطوة . . إنت عارف الدنيا جرى فيها إيه . . رحت مرة إسكندرية . . شفت أكوام اللحم العريان ع البلاج . . دى حاجة بتحصل دلوقت في أحسن العائلات . . ويمكن تلاقي لك أخت والأبنت عم بين العرايا .
  - اخرسي يا ولية .
  - خرست . . لكن خرسي مش حايحل المشكلة .
- أنا سبت لكو المشكلة . . وسبتو لكو خرابة القرن العشرين إللى ساكنين فيها . . وبنيت لى هنا عار جميل مع ربى . .
  - (في دهشة وهي تتلفت حولها) عبار . . فين هو العبار ده .
    - عار القلب يا ولية.
- آه . . لكن ده عار مش حايقنع حد . . عار ما حدش شايفه . . اللي شايفينه إنك في مزبلة ما يرضاش بيها

- كلب.
- ما يهمنيش حد .
- والدين قال لك انقذ نفسك ولا يهمكش حد.
- أعمل إيه . . بح صوتى وما حدش عاوز يسمعنى .
  - انزل للناس.
  - نزلت لهم طردونی .
  - خد بإيدهم يطلعولك.
- خدت بإيدهم كسروا إيدى وزقلونى بالطوب وما حدش فكر يطلع معايا .
  - أبدًا . . أنا طلعت لك النهارده وكرشتني بالنبوت .
    - لأنك عرضت على صفقة قذرة.
- رتضعك وتقهقه ) أبدًا صدقنى كنت بضحك . . كانت نكته لبداية التعارف وطرح الكلفة . . صدقنى أنا جيت هنا عشان أغير حياتى كلها .
  - في الحالة دى تبقى لنا نظرة ثانية.
  - آى والله أنا نفسى (بدلع) فى نظرة ثانية .
    - أنا بتكلم جد . .
  - وأنا بقول جد . . نظرة يا شيخ طنطاوى .
- يعنى لازم تثبتى حسن نيتك الأول بخلع الملابس المتهتكة دى.

(تقف لفورها وتبدأ ف خلع ثوب البلاج والمايوه على حين يصرخ الرجل الصوف ويدير وجهه) . . .

- يا حفيظ . . يا لطيف . . أعوذ بالله .
- إيه . . إنت مش قلت نقلع الملابس المتهتكة دى .
- أنا ماكملتش كلامي يا ولية . . أنا قلت تقلعي الملابس
   المتكة دى وتلبسى هدوم حشمة .
  - في الحر ده يا برهومي
    - يا إه ؟
- - يا سيدة سونيا من فضلك.
- يا إه . . يا سيدة . . دى كلمة زى الضريح . . أرجوك ما تحطش زباينك فى أضرحة من أول يوم . . ابتدى بالبساطة ورفع الكلفة . . قول لى يا سنسونى وأنا أقول لك يا برهومي .
- سنسونی . . ! ! ؟ اسمحی لی فی التعبیر . . ده أسلوب للتنادی فی الفراش .

- لا . . لا . . لا . . عيب اخص عليك . . اسمح لى يا سيدنا الشيخ إنت خيالك سافل جدًّا . . أراهن إنك تخيلتني في حضنك . . اعترف . . أنا أحب الصراحة . . صحيح إنت راجل طاهر الأفعال لكن سافل الخيال . . سافل من جوه . . اعترف . . أرجوك . .
  - أعترف إن قلبي لا يخلو من الزيغ أحياناً.
- الزيغ . . كلام جميل أوى يا سيدنا الشيخ . . أنصحك بقى ما دام قلبك زاغ تبقى تزوغ إيدك وتزوغ عينك يبقى أشرف لك على الأقل . . يبقى قلبك زى فعلك . . مفيش كذب . . مفيش نفاق .
- لأده مش صحيح . . الإنسان بحكم كونه روح وجسد له طبيعتين متنازعتين ، ولا يطعن في صدق الإنسان أن يعانى جذب الشهوة وجذب العفة في وقت واحد لأن هي دي حقيقته . . أما الاستجابة لسفالة القلب بسفالة اليد بحجة الصدق فهي مغالطة شيطانية . . والإنسان اللي بيقاوم نوازعه الشريرة هو على الأقل إنسان ترجى نجاته وفيه أمل منه . . أما الإنسان اللي يستجيب لكل وسوسة بفعل فورى . . فهو إنسان الفي يستجيب لكل وسوسة بفعل أمره . . فهو إنسان انضم إلى زمرة الحيوان وانتهى أمره . . ولا صدق في الموضوع . وإنما غفلة

واستغفال . . واحنا بنى آدمين مش ملايكة . . الملاك هو الوحيد الطاهر من جوه ومن بره لأنه من نور . . أما احنا فمن الطين . . . ظلمانيين ونورانيين فى وقت واحد .

(طول الوقت كانت سونيا تستمع إلى الشيخ فى اهتمام وانبهار وهى ترد كالمأخوذة) :

- الله . . فلسفة لطيفة . . أول مرة فى حياتى واحد يكلمنى فى فلسفة دينية . . يا سيدنا الشيخ أنا معجبة بيك جدًّا . . والظاهر إنى حاحبك يا برهومى وحانضم لحزبك . . خدشفطة من الجلاب رطب حلقك .
  - سیبك من حكایة برهومی دی.
- یا شیخ ما تبقاش حنبلی وافرد التکشیرة دی وقول یا باسط . . لوجیت لنا فی البلاتوه حاتسمعنا ننادی بعض سوسو وبوسو وتوتو وکوتوموتو ، ونبوس بعض و نحضن بعض کده بمنتهی البراءة . . الواحدة منا تبوس الواحد فی بقه وکأنها بتشرب حاجة ساقعة أو بتقزقز لب . . حیاة سبور مفیش عقد ولاکبت . . تفتکر بوسه زی دی تدخل عندك فی بند الحرام .
- تدخل عندی فی بند أسوأ من بند الحرام ، هو بند الهوان

- الكامل والبهدلة والرخص لأشياء عزيزة وجميلة . . أنا رأيى أن القرود حالهم أحسن منكم . . على الأقل بيفرقوا بين الحب وبين قزقزة السوداني . . لسه عندهم متعة بيتقاتلوا عليها .
- معاك حق . . تعرف إنى ما بقيتش ألاقى متعة فى أى حاجة وعشان كده جيت لك (نميل عليه بطريقة حميمة) ، تفتكر يا سيّدنا إنى لو غطيت جسمى ولبست حسب الشرع ومشيت على دستورك فى العبادة والطاعة ممكن ترجع لى المتم الملتهة بتاع زمان .
- المتعة . . المتعة . . إنتى مفيش حاجة عندك غير المتعة . . شوفى يا ست إذا كان مالكيش هدف فى الدنيا غير المتعة ، شوفى لك مرشد غيرى . . أنا راجل دين مش سمسار متع .
- بقى بصراحة كده أنا بفكر فى كل حاجة بطريقة عملية . . وأنا هدفى من الدنيا الانبساط . . وربنا خلقنا فى الدنيا عشان ننبسط ونتمتع . . خلق لنا الأكل عشان ناكل مش عشان نجوع . . والآ إيه ؟
- بالعكس تمامًا . . ربنا خلق لنا شهوة البطن عشان نقاومها ، وخلق لنا شهوة الجنس عشان نحكمها . . رينا

- خلق لنا الجسد زى السلم عشان نقهره ونطلع عليه . - نطلع نروح فين ؟
- تؤكد وجودنا كأرواح جديرة بالخلود لاكأجساد فانية تستعبدها الشهوات.
- مش فاهمة . . المرة دى فلسفتك صعبة شوية يا سيدنا الشيخ .
- يعنى الإنسان ما يبقاش إنسان إلا لحظة ما يقاوم شيء بيحبه أويتحمل شيء يكرهه .. أما حالة الاستسلام لكل نزوة فهي دى الآلية الحيوانية . . السباح بيأكد إرادته لما يعوم ضد التيار . . أما إللي بيستسلم للتيار يوديه مطرح ما يوديه بيبتي كيان ميت . . مفيش فرق بينه وبين لوح خشب عايم ع الميه . . الإنسانية مقاومة وعمرها ما تكون استسلام .
- كلامك فى الفلسفة لذيذ يا سيدنا الشيخ بس يا خسارة كله كلام نظرى .
  - يعنى إيه ؟
- یعنی مش فاهمة . . یعنی نفسی تدینی درس عملی عشان
   أفهم أكتر .
  - إزاى يعنى ؟

- يعنى تدينى درس فى الحب ع الطبيعة كدة . . درس مشفوع بالأمثلة على الواقع عشان أقتنع أكتر . . يعنى مثلاً نجرب الحب مع الفلسفة والحب بدون فلسفة . . ونجرب القبلة بدون مقاومة . . والقبلة مع المقاومة . . نحاول احنا الاثنين نقاوم الجنس عشان نأكد روحنا . . ونحاول مرة ثانية إن احنا ما نقاومش . .
  - (في غيظ) إنتي حيوان مفيش فايدة فيه.
- (فى دلع) لكن بالذمة مش حيوان ظريف. قطة رومى مدلعة ومتربية ع الحجر.. بالذمة مش نفسك تدلعنى وتسرح لى شعرى ؟
  - 9 01 -
  - وتأكّلني بإيدك؟
  - إه . . ؟ يا خبر إسود . !
    - ده خبر إسود ده . . !
- ده خبر زفت هباب قطران . . انتی مصیبة . . کارثة . . و باء معدی . . شیطان رجیم . . أعوذ بالله . . ابعدی عنی یا ولیة .
- حلمك على لحظة . . اديني فرصة . . حاول تفهمنا احنا يا ستات . . مفيش واحدة ست مستعدة تسمع كلام

أينشتين اللى بتقوله ده . . ولا حاتلاقى واحدة توجع دماغها بالفلسفة بتاعتك دى . . الستات يحبوا يتكلموا فى حاجات عملية مفيدة .

- زى إيه ؟
- الموضات الجديدة ، صينية كوسه بالبشاميل ، طقم شاى ، سجاجيد شنوا ، ماركات عربيات ، عريس لقطة رانديفو ، تسريحة شعر . . بارفان جديد . . فضيحة مثيرة . . المهم حاجة عملية . . لذة محسوسة . . مش نظريات في الهوا . . ووجع دماغ ع الفاضي .
  - يعنى عاوزين منا إيه . . ؟
- یعنی أنا مثلاً عاوزة أعرف حایجری إیه لو بستك فی بقك
   کده .

(تنقض عليه وتخطف منه قبلة . . ثم تعود فتنقض لتأخذ قبلة طويلة فينتزع نفسه منها وينتفض قائمًا وهو بمسك رأسه من الدوار) .

- يا رحْمن يا رحيم . . يا رحمن يا رحيم . . يا حفيظ . . يا لطيف . . أعوذ يالله من الشيطان الرجيم . . أعوذ بالله من الشيطان الرجيم . . أعوذ بالله .
- مالك يا برهومى . . دخت يا حبيبى . . أجيب لك نشادر .

- غوری من وشی یا ولیة . . إنتی عاوزة منی إیه (یصرخ)
   عاوزة منی إیه . . ؟
  - عاوزة الصراحة ؟!!
    - أرجوكي .
  - الصراحة الصراحة ؟!!
  - أيوه الصراحة الصراحة .
- حاكشف لك ورقى وأحكيلك مشروعى كله امبارح كان عيد ميلادي الثلاثين فكرت أقعد مع نفسي قعدة صراحة وأفاتح نفسي بكل شيء وأحاسب نفسي على كل يوم عشته .. وكانت مفاجآه .. اكتشفت إنى فشلت في كل شيء.. فشلت في الحياة ، فشلت في الحب ، فشلت في الزواج برغم المليون راجل اللي بيصقفوا لي ، والمليون ترانزيستور اللي بتهتف باسمى ، والمليون جنيه رصيدى في البنك، برغم النجاح والشهرة والمجد والفلوس، اكتشفيت إنى في الحقيقة بعيش حياة سخيفه مالهاش طعم. حياة كلها كدب في كدب في كدب. ساعتها فكرت إنى أطلب الخلاص عندك . . أسيب الشهرة والمجد وأجى لك فى الخلوة اللي أنت عايش فيها . . وأسلم لك نفسى تطهرها بطريقتك.

وعشان كده جيتي . .

- جيت لقيت راجل ما بيفكرش في أي حاجة غير تخليص نفسه . . وحيد زي بومه في خرابة ما عندوش ميه يستحمى ولا ميه يشرب ولا في بيته كهربا ولا راديو ولا تليفزيون ولا تليفون ولا حتى حنفية ميه ولا سرير ولا حتى تواليت للضرورة . . . أقولك الحقيقة . . . صدمتني . . .

يعنى مفيش خلاص إلا بالقذارة ؟ ...

يعنى مكتوب على الخطيئة إنها تعيش فى قصور البنور والكرستال ومكتوب على الفضيله إنها تعيش فى جحور الطين ؟ ..

- اسمحى لى أشرح لك.
- اسكت أرجوك . . أنا عارفة أنك حاتبرجلني بالكلام الهيروغليني بتاع أينشتين بتاعك . . وأنا مش فاضية للفلسفة والنظريات . . أنا واحدة ست عملية وفي جيبي مشروع جاهز للتنفيذ فورًا . .
  - ادینی فرصة أوضح .
  - هس . . اسمع قراراتی النهائیة وما تفتحش بقك . (تخرج من جیبها ورقة وتقرأ):

قرار رقم (۱) – إدخال النور والمية والراديو والتلفون والتلفون والتلفزيون إلى مزبلة الشيخ طنطاوى فورًا، وذلك على حسابى الخاص.

قرار رقم (٢) – يأخذ الشيخ طنطاوى مفتاح عربتى ودفتر شيكاتى وتوكيل كامل شامل للتصرف فى جميع عائداتى المالية وإنفاقها على الدعوة لمبادئه كما يشاء.

قرار رقم (٣) – تهدم الخرابة التي يعشش فيها الشيخ طنطاوى مع الوطاويط والخنافس وتردم محتوياتها في حفرة .

قرار رقم (٤) – تنصب عدة خيام جديدة عصرية مكانها مزودة بكل وسائل الراحة .

قرار رقم (٥) – على الشيخ طنطاوى أن يتسلم مهام منصبه اليوم كمرشد روحى للست سونيا وفرقتها التمثيلية ليعيش من هذه اللحظة للآخرين لا لنفسه . . وعلى جميع أفراد الفرقة طاعة أوامره بلا نقاش وبلا مراجعة . .

قرار رقم (٦) - على الشيخ طنطاوى أن يخلع الخرقة المرقعة اللهذرة التي يلبسها ويرتدى زى عصرى مناسب لدوره القيادى فى فرقة سونيا المسرحية.

قرار رقم (٧) – تعتبر هذه القرارات شاملة النفاذ والتحقيق

فور النطق بها بقوة الحب وسلطة القانون والعقل والمنطق التي تأمرنا جميعًا بالنظافة والتمدن.

# (الشيخ طنطاوي يصرخ محتجًا):

- أنا أرفض هذا الانحطاط.
- سونيا (في استنكار) انحطاط . . بتقول انحطاط .
  - أيوه بقول انحطاط .
  - نور الكهربا في البيت انحطاط.
    - نور القلب أهم .
- وإيه المانع يكون عندك نور في القلب ونور في البيت؟
- يا ريت بس ندفع الفاتورة من مال حلال . . أما إذاكان
   مفيش مال يبقى ننام فى الضلمه أحسن ما ننور البيت من
   عرق الست سونيا .
- عرق حبيبتك سونيا من الحلال وحياتك . . ومن عين الحلال . الحلال .
  - من عين بيشرب منها الخنازير.
  - (تنزل فيه ضربًا ولكمًا وشلاليت وهي تبكي من الغيظ)
- سافل . . منحط . . مجرم . . ليه تكسر قلب ولية غلبانة عاوزة تتوب . . ليه تقفل في وشها باب الرحمة ؟
  - عشان هي عاوزة تفتح في وشي باب جهنم.

- أبدًا أنا جاية أحط عمرى كله تحت تصرفك . . أحط قلبى تحت أمرك . . أحط إرادتى تحت رجليك (تتعلق برقبته متوسلة) قول لى إنك حاتساعدنى . . قل لى إنك قبلتنى عندك .
  - متأسف . . أنا رافض .
  - رسد مد بيديها) إنت حاتقبل غصب عنك .
- (يحاول أن ينزع يدها) أنا أرفض إنى آخد مليم من فلوسك اللي جمعتيها م الدعارة .
- (تسد هد بقوة) حاتقبل . . حاتقبل يا برهومى يا سافل لأنك سافل الخيال . . حاتقبل لأنك بتتمنانى فى أحلامك وإن كنت بتشتمنى فى يقظتك . . حاتقبل لأنى أنا عروسة أحلامك . . أنا سنسونتك وبسبوستك وقطقوطتك وشهوتك ووسواسك اللى بيلعب فى عبتك بالليل والنهار . . أنا الحيوان الجميل اللى مخبيه تحت العر المرقع إللى انت لابسه . . تحت جلدك وعظمك يا شيخ يا خباص . . تحت لسانك إللى حاياكله الدود . . أنا عقلك الباطن بكل رغباته القذرة . . أنا غريزتك المغروسة فيك . . مش حاتقدر ترفضنى ولا تنزعنى من المغروسة فيك . . مش حاتقدر ترفضنى ولا تنزعنى من

دمك ولحمك . . مش حاتقدر تسلخنى من جسمك لأنى حته منك . . لأنى حقيقتك .

# طنطاوى: (وقد بدأ عقله يتوقف تحت ضرباتها المستمينة وبدأت قواه تفلت منه)

- أنا . أنا . لأ . لأ . أرجوكي .
- (تطوقه بنواعيه) حاتقبل لأنى بحبك . . باعبدك لأنك أملى الباقى وخلاصى الوحيد . . لأنك حياتى ونجاتى لأنك شباك التوبة إللى حابص منه للسما . . وأنا باب اللذة إللى حاتدخل منه لِجَنة الأرض . . أنا صندوق الدنيا وعلبة الملبس . . وكنز المجوهرات . . أنا سونيا .
  - انا ما تحكمنيش امرأة . . مستحيل . . مستحيل . .
- (ما زالت تطوقه) كل الرجالة بتحكمهم الستات . . احنا دايمًا إللي بنحكمكم . . بالحب بالجنس بالقبقاب بالفلوس بالاستغفال بالاستحار بالاستهبال . . وأنا عندى جميع الأسلحة دى . . وانت عبدى وسيدى وحبيبى ومولاى وسجين زنزانتي . . برهومى . . معشوقى . . مالكش مهرب منى ولا نجاة ولا فرار .
  - (يقضم على شفتيه وأسنانه) حاهرب .
    - (وهي تطوقه بلراعيها) إزاى ؟

- (وهو يرتجف) حاهرب.
- مش حاتقدر تهرب منی . . لأنی فیك . . فی دمك . . أنا بجری فیك . . أنا بخری فیك . . أنا تلبك .
  - روهو يرتجف حاوقف نبضى حاخنق قلبى .
    - إزاى ؟
- ريصرخ باكياً) يا ربى . . ليه خلقتنى ضعيف . . ليه خلقت ليه خلقت لي الفتنة وسلطت على الإغراء .
- اسأله ليه خلقت سونيا . . ليه خلقت خدود التفاح وشفاه
   الكرز ونهود المرمر .
  - (يرتجف) سونيا.
  - حبيبي . . أملي . . حياتي . . نجاتي .
    - هلاكي ولعنتي وضعني .
  - أبدًا . . أنا نشوتك وأنسك وراحة قلبك .
    - أبدًا . . إنت ضياعي . . وانحطاطي .
- حبیبی برهومی . . ما تفکرش . . انسی کل حاجة . .
  احلم زی ماکنت بتحلم وانت نایم نعسان بتفکر فی .
   مدن ا
  - سونیا .
  - أنا سونيا . . خدامتك وجاريتك .
    - (ينهار على صدرها) سونيا.

- أنا سونيا . . ألذ سونيا . . أنا الدنيا
  - (يقبلها) سونيا.
- البوسة دى معناها إنك مضيت على المشروع . . وبكرة لابد من تنفيذ جميع البنود .
  - (يقبلها) سونيا.
- سونیا فی خدمة مبادئك . . كل فلوسی رهن إشارتك . . . كل ما أملك تحت تصرفك .
  - سونيا .
- - تطاوعینی یا سونیا ؟
  - بدون مناقشة يا حبيبي .
    - مهما طلبت.
    - ولو طلبت روحي .
  - هي روحك اللي عاوزها . . عشان أغيرها .
    - اطلبها تلاقيها بين إيديك . . أأمر ؟
- فى الحقيقة مش عارف مين اللى حاياًمر . . مين حايكون الآمر ومين المأمور . . دى هى المشكلة .
- خلى المشاكل لوقتها . . ما تستعجلش . . خلينا نعيش

لحظة بلحظة . . إحنا ورانا إيه . . ؟ ! تلتق شفاهما في قبلة . . ينزل الستار على القبلة في بطء .

## القصهلالشاني

(صحواء . . نهار

نفس مكان المشهد الأول لكن يد البناء والتعمير قد أشادت من الخراب شيئًا آخر . . هناك وابور نور وماكينة لضخ الماء وأكشاك وخيام جديدة نظيفة مزودة بكل أدوات الرفاهية الحديثة . . مئذنة جامع على البعد . .

فى الوسط وفى مقدمة المسرح خيمة على طواز عصرى أمريكى من الحرير الملون هى خيمة الشيخ . . تتدلى فيها النريات الكريستال وعلى الأرض سجاجيد وطنافس وأثاث فاخر من الحشب المطعم بالصدف . . تليفزيون وتليفون وفرنجيدير وراديو) .

(حينا يبدأ المشهد تكون الخيمة خالية . . ويكون المسرح خاليًا باستثناء بعض عال نراهم فى الحلفية يبنون ويشيدون ويمدون أسلاكًا . . ونسمع صوت مطارق تعمل) . (ثم يدخل عدد من الدراويش الفقراء كل منهم يحمل زاده على ظهره . . هم أحمد وعيسى وزكريا ويحيى وإسماعيل وإدريس . . يتلفتون حولهم فى استغراب . . يجومون حول الخيمة . . يسأل بعضهم بعضًا) .

زكريا : عجيبة . . احنا فين . . احنا تهنا وإلا ايه . .

عيسى : مش ممكن نكون تهنا . . أنا عارف الصحرا دى شبر شبر .

ادریس: وهی دی أول مرة نیجی . . ؟ دحنا کل سنا بنیجی للشیخ . . حانتوه عن مکانه إزای . . ؟!!

إسماعيل: طيب هو فين؟

يحيى : صحيح هو فين ؟

عيسى : أنا أحلف إن عشة الشيخ مطرح ما أنا واقف..

أنا ذا كرتى ما تخونيش.

أحمد : أمال هو فين ؟

زكريا: وإيه المناظر والتعاليق دى؟

عيسى : العلم عند الله . . كل شيء بيتغير في الزمن النكد ده . .

كل شيء بيتقلب حاله.

زكريا: قصدك إيه؟

عيسى: قصدى جايز يكونوا طردوا الراجل الغلبان عشان يبنوا مدينة سياحية أو (يتلفت حوله) أو سيرك أو مدينة فنون . .

من الحاجات الموضه اللي بنسمع بيها دلوقت.

إسماعيل: (في بساطة وسذاجة وانفعال) وفيه حد يقدر يطرد الشيخ طنطاوي قطب الزمان وخاتم الأوليا.

إدريس: والعارف الرباني.

أحمد : والمعدن الصمداني

يحيى : والغوث

إسماعيل: وبرزخ البرازخ.

ادريس: وفريد عصره ووحيد دهره.

عيسى : العصر دلوقت غير العصريا خال والدهر غير الدهر والزمان غير الزمان وشيخنا راجل طيب مسالم . . وأرض ربنا واسعة . . والله جعل لنا الأرض كلها مسجدًا . . تفتكر الراجل حايقوم الدنيا ويقعدها لوطردوه . . أبدًا . . حايشيل زاده وزواده ويرحل

اسماعيل: لا إله إلا الله.

زكريا : وحايرحل يروح فين ؟

عيسى : علمى علمك

(يدخلون الحيمة الحريرية الفاخرة . . يتلفتون حولهم في انبهار ) .

ادریس: ایه دی . . کل دی خیمة . . دی خیمة عجیبة أَوِی یا سیادنا .

عيسى : وحاطينها مكان خيمة الشيخ بالضبط.

(يتحسسون السجاجيد والطنافس ويفتحون الراديو والتليفزيون وبجربون كل شيء في فضول وطفولة).

إدريس: دى خيمة ملوكى . . كل حاجة هنا ملوكى يا سيادنا (يجلس على كرسى من القطيفة ويضع ساقًا على ساق ويضع صرة طعامه على كرمى آخر . . بمد يده إلى دورق فيه شراب مثلج إلى جواره ويكرع عدة كرعات من الشراب وهو بمصمص في طرب الله . . ده شراب مادقتش زيه في حياتي . . ده شراب من الجنة يا شيخ أحمد .

أحمد : (يذوق جرعة من الشراب) الله . . ده شراب تفاح .

يحيى : (يكرع كرعة هو الآخى لا ده شراب لوز.

اسماعيل: (يشرب هو الآخي) لا ده شراب ورد.

(يتمددون كل واحد على كرسى في استمتاع وانبعاج).

عيسى : (يضربهم بمقرعة فى يده) شربتم شراب المترفين وجلستم جلسة المترفين . . هلكتم يا أبناء الأفاعى . . قوموا . . هبوا من غفلتكم . . غادروا هذا السجن . . ما لهذا جئنا .

(ينتفضون واقفين واحدًا بعد آخي) .

إسماعيل: آى والله سجن . . دنا حسيت من لذة الكرسى إنى مسمر فيه . . مشلول تمام . . مش قادر أسيبه . . أعوذ بالله م الفلوس . . دنا اتهيأ لى إنى ملكت الكرسى . . أتاريه هو اللى ملكنى . . يا ساتر يا رب .

عيسى : هكذا عروش الملوك يستولى عليها الملوك فى البداية ثم تستولى عليهم فى النهاية . . وهكذا المال تظنه فى البداية خادمك ثم تكتشف فى النهاية إنك خادمه .

إسماعيل: صدقت . . الدنيا سجن المؤمن .

يحيى : وجنة الكافر.

زكريا : أعوذ بالله من سوء الحواتيم .

أحمد : اللهم أحيني فقيرًا وأمتني فقيرًا واحشرني في زمرة المساكين .

عيسى : إن كل ما على الأرض من شراب اللوز والتفاح والورد لا يعدل فى لذته لحظة واحدة من سكينة القلب . . صدقونى يا إخوانى . . لو عرف الملوك ما نحن فيه من لذه لقاتلونا عليها بالسيوف .

أحمد : مدد يا شيخ طنطاوي مدد.

إدريس: يا دليل الدليل دلنا على أرض الخليل.

يحيى: نظرة يا سيدنا نظرة.

إسماعيل: يا باب النبي . . يا باب الفتوح .

زكريا : (فى قلق) الوقت بيمر والشمس حاتغرب علينا ومش حانلاقي مكان نبات فيه .

أحمد : قلبي بيقول لى إننا حانلاقى الشيخ هنا وإنه مش بعيد.

عيسى : ما افتكرش . . أنا عارف طباعه . . هو ما يحبش النرف ولا المترفين وما يحبش يعشش جنبهم . . ويهرب من الأغنيا هربه من المجذومين .

زكريا: ربنا يسوق لنا من يدلنا عليه.

(يدخل الشيخ طنطاوى فى نفس اللحظة من باب خلنى فى الحيمة فى بدلة كحلى فاتحة أنيقة وكرافته حمرا حليق تمامًا وشعره مكوى مرجل . . خدوده موردة من الطعام الجيد) .

(يدخل منكس الرأس مستغرقًا في التفكير)

(لا يعرفه أحد من أتباعه ومريديه).

(يتقدم منه زكريا في وجل)

زكريا : لا مؤاخذة يا حضرة الأفندى إذا كنا دخلنا هنا بدون استئذان .

(ينظر اليهم الشيخ طنطاوى . . يبهت وجهه لحظة . . لقد عرفهم من أول نظرة ولكنه كتم أمره) .

زكريا : لكن معانا عذرنا أصل ده مكان خلوة الشيخ طنطاوى . . شيخنا اللي بنجيله كل سنة . . لكن الظاهر الدنيا اتغيرت . . والحال بقي غير الحال . . وشيخنا شال عزاله ورحل . . لازم حضرتك عندك خبر بيه . .

بحيى : دلنا عليه ربنا يفتح عليك .

(عيسي يقترب ويتفرس في وجهه)

عيسى : (فى دهشة) عجيبه . . ده انت الجالق الناطق . . كأنك أخوه من أبوه وأمه !

طنطاری: هو بشبهنی ؟

عيسى : كأنك هو!

- إيه الفرق بيننا!
- هو شفاف زى شعاع الشمس صريح زى النهار فى يوم صيف ، قوى كما الصلب قاطع كما الماس .
  - وأنا ؟

معتم زى الأرض رخوكالعجين ملبدكجو الخماسين . . . إنت راجل بيبدل جلده كل يوم زى التعبان . . إنت شخص من غير شخصية .

طنطاوی: (یلقی القنبلة) خیالك شطح بیك بعید أوی المرة دی یا شیخ عیسی .

(ينتفض الشيخ عيسى من المفاجأة وقد اصفر وجهه تمامًا) .

- مستحيل . . مستحيل !!
- ولیه مستحیل . . الشیخ طنطاوی بلحمه و دمه هو إللی و اقف قدامك .

(يتجمد الدراويش من الذهول . . طوال الحوار التالى يظلون كالتماثيل يعبرون بإيماءات) .

طنطاوی: (بمد يده لعيسي) سلم . . دی إيد الشيخ طنطاوي .

عيسى : (يرفض أن يسلم على اليد الممدودة) مش معقول . . أنا ما أعرفوش . . ولا أسلم عليه .

ولیه مش معقول . . ولیه ما تعرفوش ولیه ما تسلمش
 علیه .

- أصدق أن الهدوم تتغير.. لكن إزاى النفوس تتغير؟! - ومين قال لك إن النفوس اتغيرت؟
- لا يمكن تكون الشيخ طنطاوى اللى أعرفه . . اللى ياكل من الأكل ده ويتقلب ع الحرير ده لازم يتغير . . المال غير قارون وجعل منه فرعون .
- لأنه وضع المال فى قلبه وضن بيه ع الجميع ولوحطه فى جيبه وفرقه ع الجميع لانقلب المال نعمة . . وديننا ليس ضد المال وإنما هو ضد الذل للمال .
  - دى آراء جديدة على شيخنا .
- لكن آراء صحيحة . . ورسالتنا البحث عن الآراء الصحيحة . الحق بكل سبيل .

زَّكِرِيَابِهُ : (هامسًا) سبحان من يغير ولا يتغير (بصوت مرتجف) سبحان من يغير ولا يتغير .

عیسی : سبحان (متلفتًا) ده غیّر حاجات کتیره أُوی (بموییدیه علی جوانب الحیمة الحریریة) شایف الحیش بنی حریر إزای بقدرة قادر یا شیخ زکریا .

زكريا : (يتحسس الخيمة) يا ترى خيمة مين الحيمة البديعة دى ؟ طنطاوى: خيمتى .

عيسى : معنى كده إنك عمدة المولد ده أو السيرك ده .

## طنطاوى: تقريبًا ..

- وإنك تركت السلك الصوفى وهجرت الطريق.
  - مطلقًا . . أنا ما زلت على عهدى .
    - إزاى . . دى تبتى فزورة
- سليمان كان ملكًا وكان له هيكل من الذهب وخمسمائة زوجة ولم يحل هذا دون أن يكون نبيًّا له عند الله الزلني وحسن المآب . : السؤال هو ماذا نفعل . . وليس ماذا نملك . . أو هو على وجه الدقة ماذا نفعل فيما نملك .
  - دى فوازير وألغاز.
- لقد كان إبراهيم أبو الأنبياء مالكًا لعدة ضياع وعدة ألوف من رءوس الأنعام . . ولكن عندما تطلب الأمر أن يذبح ابنه تقدم دون تردد ليذبح ابنه . . وحينا أوقد له الكفار نارًا ليلقوه فيها تقدم وألق بنفسه في النار دون خوف . . السؤال هو ماذا نفعل وليس مإذا نملك . . الغني المستغنى مسلم أكثر من الفقير المحتاج . . إن خرقة الصوفي التي تلبسها إن تجديك نفعًا إذا كنت كذابًا منافقًا .
  - هذا علم جديد أحب أن أتعلمه.
    - ابق معى وأنا أعلمك.
      - إزاى؟

- أنت مثقف وعندى لك وظيفة تناسبك.
  - حى إيه ?
  - مدير بلاتوه.
  - (في استغراب) مدير إه؟
- مدیر بلاتوه بمرتب ۲۰۰ جنیه وعربیه وسواق تحت أمرك . . قلت إیه ؟
  - وحاعمل إيه بالضبط في ال. . البلاتوه ده ؟
- تنفذ تعليماتى بدون سؤال وبدون مناقشة كعادتنا فى أدب الطريق . . حسب قانون السالكين المريدين مع
  - ج. شيخهم . . ألست مريدي وأنا شيخك ؟
- كنت شيخى فى الماضى . . أما الآن . . فأنا بصراحة أشعر أنى أمام رجل آخر لا أعرفه . . أشعر بالحيرة تمامًا . . لا أفهم ؟
- ألست مؤمنًا بالله وبالقدر . . ألا نصح ونمرض ونجوع ونشبع . . ألا يجرى الله علينا من الامتحانات ما يشاء . . ألا يبتلينا بالخير والشر . . ألا يدخلنا في تجربة تلو تجربة .
  - لا أفهم ؟!
- هى تجربة أدخلنى الله فيها وامتحننى بها ويدخلك فيها ويمتحنك بها . . أترفض . . أتستطيع أن ترفض . .

- أتستطيع أن تغير ما خطه الله لنا في الكتاب.
- حاشا لله . . ولكن لا يجوز لنا أن نرتكب خطيئة ثم نقول
   إن الله أمرنا بها .
  - وهل أمرتك بخطيئة . . وهل أمرتك إلا بخير؟
    - ووظيفة مدير البلاتوه ؟
- هى أن تلبس للناس لبوسهم وتعيش حياتهم وتكلمهم بأسلوبهم . . لوكان مراد الله لنا هو العزلة لما أخرجنا من الأرحام ولتركنا معزولين فى بطون أمهاتنا . . علينا أن ننزل إلى الناس . . إن كلماتنا الجميلة فى الخلوة لا تصل إلى أحد .

حينا كان الناس فى الماضى يشتغلون بالسحر أرسل الله لهم موسى يخرج من العصا ثعبانًا ، وحينا اشتغلوا بالطب أرسل لهم عيسى ليشفى الأبرص ويبرئ الأعمى ، وحينا اشتغلوا بالفصاحة أرسل لهم من يتحداهم بالقرآن . . كان الله دائمًا يرسل للناس من يلبس لهم لبوسهم . . واليوم الناس يشتغلون بالسينا والمسرح والتليفزيون وليس أمام المصلح إلا أن يعمل فى البلاتوه .

- : ولهذا نزلت إلى البلاتوه.
- أنا أدير كل مدينة السينما والمسرح المبنية على المساحة

- الكبيرة خلفك وأشرف على كل ما يجرى فيها .
- عجيبة . . دى مواهب جديدة لم أكن أتوقعها من الشيخ طنطاوى . . ألا تخشى أن تخطئ فى هذا المجال الجديد الذى لا تتقنه .
  - لا يهم أن نخطئ ولكن المهم أن نتعلم من الخطأ .
    - هذه جرأة تذهلني !؟
- أحيانًا يلتى بنا فى البحر ولا يكون أمامنا اختيار سوى أن نتعلم السباحة برغم أنوفنا وبدون معلم . . نتعلم من التجربة والخطأ .
- ربعصر دماغه فی حیرة) ولکن . . کیف . . کیف حدث کل هذا . . کأنی فی حلم . .
- حى قصة طويلة ستعرفها فى أثناء عملك فى البلاتوه.
  - أهي رواية ؟
  - الدنيا أحيانًا تبدو كالرواية .
    - كىف؟
- لقد دخل ناس جهنم لأنهم قالوا . . كيف . . ومتى . . وأين . . ومن خلق الذى خلق . . ولماذا هناك البصير والأعمى والحشرة والإنسان . . ولماذا يخلقنا الله ويعذبنا ولماذا يُقدِّر علينا ويعاقبنا . . ولو أنهم آمنوا وأسلموا

- لعلَّمهم ربهم . . ولو أنهم اهتدوا إليه لهداهم في حيرتهم . - صدقت .
  - صاحبني ولا تسأل وسوف يعلمنا الله من علْمه .
    - والبس لبوسك ؟
      - وما الضرر؟
    - وآكل طعامك ؟
- وما المانع ؟ الله لم يمنعنا من أكل الطيبات ولا حرم علينا
   الزينة ما دامت من حلال .
  - وهل هي من حلال ؟
- هذا يتوقف على نيتك وفعلك والفم لا تنجسه اللقمة التي تدخله بل الكلمة التي تخرج منه.
- إن ما يخرج من فم الممثلات والممثلين فى بلاتوهات السينا
   والمسرح ينجس أمة بأسرها .
  - هذا هو الأمر الذي سأحاول أن أغيره.
    - سيغيرك هو قبل أن تغيره .
      - هى معركة لابد منها.
  - فرد واحد فی مواجهة عصر. . النتیجة معلومة .
    - الأنبياء كانوا أفرادًا وغيروا عصورًا.
      - إنهم أنبياء.

- والمصلحون كانوا أفراداً أيضًا واستطاعوا أن يغيروا عصورهم .
  - حلم كبير؟
- لا نستطيع أن نقف مكتوفى الأيدى نرى الفساد يدب فى كل شيء ونكتنى بالتراتيل والتسابيح فى الخلوات.
- هذا أفضل من أن نفسد مع الفاسدين ونسقط مع الساقطين .
- الحكم بدون تجربة تشاؤم لا مبرر له والله يأمرنا بألا نيأس من رحمته . . الواجب أن نحاول قبل أن نطلق أحكامًا فارغة فى الهواء بلا ممارسة وبلا خبرة .
  - حاول وحدك ...
- أتتركنى أحاول وحدى . . أتتركنى أصارع الطوفان وأقف أمام السيل وحدى وتهرب متذرعًا بتسابيحك . . أهذا هو الدين . . أهذا هو ولاء المريد لشيخه ؟
  - (يصرخ) وماذا أفعل أنا العاجز؟
- ضع يدك في يدى فتصبح اثنين وتصبح قوتنا قوتين . . . أفقدت الثقة في شيخك . . أما عدت تحب شيخك ؟
- وهل أستطيع . . إنك لتعلم مكانتك منى . . وكيف أضع كلماتك بين عينى . . . بين لحمى وعظمى . . ولو قدتنى

إلى جهنم لسرت وراءك ولو استعرضت بى البحر لخضته معك . . فأنت وسيلتى إلى السماء . . وأنت أحب إلى من أهلى وولدى . . وأقرب إلى من أهلى وولدى . . وأقرب إلى من سواد عينى .

- سلمت لى يا شيخ عيسى . . وسلمت أيامك (يعانقه)
  - سأمشى وراءك ولو قدتنى إلى الهلاك.
  - بوركت يا شيخ عيسى وبوركت أيامك .
  - سوف أصحبك إلى ما تريد . . هذا قدرى .
    - بشرط .
    - وما الشرط
- أن تكون مثل قرود الحكمة لا ترى ولا تسمع ولا تتكلم وإنما تتعلم . . تصاحبنى ولا تسألنى . . هذا هو العهد بين المريد وشيخه .
  - أنا عند عهدى .
  - وغدًا تخلع الخرقة وتلبس ثوب العمل الجديد.

(الدراويش الشحاذون الذين كانوا يحملقون مبهوتين طوال الحوار الدائر ويتمتمون بتسابيح خافتة ويشيحون بأذرعهم فى حيرة ويرددون كافة الإيماءات . . نراهم الآن يحيطون بالشيخ طنطاوى والشيخ عيسى ويتكلمون فى وقت واحد) .

- واحنا يامولانا . . ما مصيرنا ؟

- حانروح فين ؟
- حانعمل إيه ؟
- وإيه التصريف؟
- حانرجع ديارنا ؟

الشيخ طنطاوى: أنتم حاتكونوا معانا . . حايوزعكو الشيخ عيسى ع الوظايف والأعمال اللى يشوفها مناسبة . . وعندنا أعمال كثيرة فى حاجة إلى أيدى بالشرط إللى اتفقنا عليه . . إن كل واحد لا يرى ولا يسمع ولا يتكلم وإنما يتعلم . . هذه كلمة العهد والميثاق على الجميع .

- (أصوات متعددة).
  - سمعنا وأطعنا .
- كلنا تحت الأمر.
- الله يفتح عليك.
  - الله يكرمك.
- بقينا موظفين يا إخوان .
- ولنا رواتب وكسوة ومعلوم.
- ونأكل ما لذ وطاب من الحلوى والكباب.
  - هذا رزق من السماء.
  - يا ترى مين إللى بيدفع .

(تدخل سونيا فى ثوب تركواز طويل فاتح عارية الظهر وعلى صدرها وردة ذهبية وشعرها الأشقر يتناثر على ظهرها كسنابل القمح).

(ينتفض الدراويش كأنما لذعهم عقرب).

(نسمع همهمات استغفار وتعوذات).

(بعض الدراويش ينظر إلى الأرض ، البعض ينظر إلى الجدران . . البعض ينظر إلى السماء . . البعض يسترق النظر فى فضول . . الشيخ عيسى يتجمد فى مكانه . . تتلفت سونيا فى وجوه الدراويش مبتسمة ) .

طنطاوى: (مشيرًا إليهم) دول هم العال والموظفين إللي كنا بندور عليهم . . وده أخويا الشيخ عيسى شاب مثقف أمين وهو أنسب الموجودين لوظيفة مدير البلاتوه .

سونیا : (ما زالت تنفحصهم بابتسامة) اختیار مناسب جدًّا . . یتعینوا فورًا . . ویتسلموا أعمالهم من الآن . . أوامر برهومی لا تناقش .

(تلق على جرس)

(يدخل خادم)

سونيا : (مشيرة بيدها إلى الموجودين) خدهم لغرفة الملابس يقلعوا (في ضحكة خافتة) ملابس التشريفة دى .

الشيخ عيسى: (معترضًا في صوت غليظ مشروخ من الانفعال) إيه هي الحكاية يا شيخ طنطاوي . . أنا عاوز أفهم .

طنطارى: (في صوت حاد باتر آمر قاطع كالصلب) هل نسيت أنك لا ترى

ولا تسمع ولا تتكلم . . أهذا ميثاق المريد مع شيخه ؟ الشيخ عيسى : (يطأطئ رأسه في امتثال) سمعنا وأطعنا . الشيخ طنطاوى : روح بهم لغرفة الملابس .

( يخرجون ) .

(سونيا والشيخ طنطاوى وحدهما . . كلاهما ينظر إلى الآخر . . سونيا باهرة متألقة مثل التفاحة المحرمة . . والشيخ طنطاوى يذرع جسدها بنظراته فى تحدى .

سونيا : إيه التحف دى . . هي دى نقابة الشحاتين إياها .

أيوه يا ستى هى نقابة الشحاتين إياها .

- أراهنك حاتعجبهم حياة البلاتوه أوى . . وحايهجروا السلك الدبلوماسي بتاعك .

طنطاوى: (وهو بتهالك على الكوسى الأوسط الذى يشبه كوسى العرش) بأين على عليهم القرف التام م الجو.

سونيا : (تدور حول الكرسي) ما داقوش طعم المهلبية لسة .

- ما تستعجليش الأمور . . هيه . . إيه أخبارك .

(فى أثناء الحوار يكون طنطاوى جالسًا وسونيا تدور حوله تحاوره وتناوره وتلاعبه وتغازله وتغريه . . هو طول الوقت محورها . . ثم ينعكس الوضع فتجلس هى ويقوم هو فى عصبية ظاهرة . . يدور ويلف حولها ويحاورها فى توتر وعصبية . . هى طول الوقت محوره ) .

- حانبتدی البروفات من بکره . . الکل فی حالة استعداد . ستاند بای .
  - حانسمي الرواية إيه ؟
    - الحب والحرب.
- (يمسك يدها) اسم جميل . . فالحب هو الحرب بعينها . . المرأة تعلن الحرب على الرجل من أول نظرة فتحاول أن تنتزعه من أهله ومن أصدقائه ومن عمله ومن نفسه . . وتغار عليه حتى من الكتاب في يده ، ومن الفكرة في رأسه . تغار من نجاخه وكأن نجاحه عدوها . . الحب البشرى أحيانًا هو العداوة مقنعة .
- یا ساتر . . أعوذ بالله ده كلام راجل صوفی یدعو الناس
   إلی الحب .
- أنا أدعو الناس إلى حب الله وليس إلى حب المرأة . . فالله وحده هو الذي يُحَب ويُعْبد لأنه وحده كامل الصفات . . أما المرأة فواجب الرجل العاقل أن يخشاها ويحذرها .
- رتغازله وتعبث فی شعره) بعد کل إللی عملته . . تخشانی و تحذرنی . . . ألم أعطك كل شيء .
- لتحصلي على كل شيء . . لتستولى على روحي ذاتها .

- وحتى روحك لن تكفينى . . صدقنى .
- نعم . . أنت تريدين أرواحنا جميعًا . . تريدين استعبادنا جميعًا . . ويا له من ثمن رخيص في سبيل هدف غال . . (يدفع بدها ويهب من كوسيه في عصبية) ثم ماذا تفعل المرأة إذا استولت على روح رجل . . إنها تعتبره موضوع انتهى بحثه ، وتلتى به في أول مزبلة وتبحث عن رجل آخر . . عن ضحية أخرى وعبد آخر . .
- (تتهالك على الكومى) وهو نفس ما يحدث إذا استولى الرجل على روح المرأة فخضعت له كالعبد الرقيق . . إنه يعتبرها موضوع انتهى بحثه ، ويرمى بها فى أول مزبلة ويبحث عن ضحية أخرى . . وجاريه أخرى . . إن الملل القاتل واستنفاد اللذة يترصد للاثنين طول الوقت .
- ريدور حولها) والمرأة تحاول أن تصرع الملل بالغيرة . . إذا رأت أن رجلها بدأ يطمئن إلى حبها تعطى نفسها لآخر ليجن جنونه .
  - اقل ما يرضيني أن تجن بي .
- أرأيت . . هي إذن معركة . . حرب . . شر . . قتل .
- (تغازله وتعابثه وتمسك بيده) بل هى اللذة واشتعال الأعصاب . . يا برهومي حاقتلك . حاقتلكو كلكم .

- مش حاتكون مسألة سهلة .
- أنا سونيا . . أنا الدنيا . . أنا وصفة مجربة بطول التاريخ . .
  - أنا أكرهك.
- (تقوم إليه فى تحدى) وبتحبنى بتعبدنى . . وغيرت حياتك كلها عشانى .
- أكرهك (يحتضنها فى يأس وضعف) أحبك . . أنت الشيطان نفسه . . عاوزه منى إيه (فى تشنج) عاوزه منى إيه ؟
- حاجات كتيره . . إحنا لسه فى أول الشوط . . إحنا لسه فى حرف الألف .
- أنت هلاكى . . أنت هلاكنا كلنا . . (ينفض فراعيها عن
   جسمه ) دى أذرع أخطبوط . . سجن . . زنزانه .
  - زنزانه فی الجنة .
  - زنزانه في الجحيم . . حاحطم قضبانها .
- عنات الأوان يا برهومي والقطر قام . . مش حاتقدر تنط منه . . . والمؤمنين منه . . . والمؤمنين مابينتحروش .
  - ربنا حاينجيني منك .
- وليه بتتصور إن ربنا فى صفك ومش فى صنى . . ربنا

أعطاك يد قوية تقتل بها الحشرة وأعطى الحشرة حناح تهرب بيه منك . . ربنا مع الكل . . وإذا كان ربنا بيحمى الحشرات م الإنسان يبقى من باب أولى يحمى الستات م الرجال المجرمين أمثالك حتى ولوكانوا أوليا .

- قریتی الکلام ده فین.. ده مش کلامك.
  - فى رواية مثلتها السنه اللى فاتت.
- من تأليف الحشاشين السكيرين مخابيل العقول أنصار الحشرات أصحابك . . ولكنى بطمنك . . فالله مع أوليائه بل هو دائمًا ناصر أوليائه . . ولكن السؤال . . هل أنا من أوليائه . . هل ما زلت من أوليائه . . السؤال . . من أنا الآن . . ومن أعبد . . من أعبد .
  - بتعبدنی یا حبیبی . . ده سؤال بسیط جدًّا .
- كذب . . كذب . . كذب . . ده مش حايحصل أبدًا .

طنطاوى: (فى صوت حاد وقد أفاق تماماً) الحكاية لسه ما انتهتش يا سونيا . . احنا لسه فى أول الشوط . . لسه فى حرف الألف زى ما قلت . . ما تستعجليش .

(صوت جرس ثم يدخل خادم يتقدم من سونيا ويميل على أذنها) .

سونيا : (ناظرة إلى طنطاوى) هيئة الإدارة عاوزة تتعرف عليك . طنطاوى: يتفضلوا .

(بخرج الخادم مسرعًا).

(يدخل فى أعقابه أربع رجال يلبسون القبعات والقمصان المشجرة . . شعورهم مرسلة وأزياؤهم فيها إغراب الفن والحرفة . . وشكلهم كرجال العصابات ) .

سونيا : أقدم لك هيئة إدارتي . . « جدّو » المدير المالي في جيبه دفتر شيكات بمليون جنيه . .

«أونكل» الرأس المخطط والدماغ الجهنمى للفرقة. «وتوتو» المخرج «وجيمى الفونت» مصمم الرقصات ودرويشنا المغفل اللى بيسكر ليل نهار وبيقول إنه عاوز يكون صادق مع نفسه.

طنطاوى: (ساخرًا) إللى بيسكر عندكو ليل نهار بتسموه درويش.

سونیا : درویش مودرن .

طنطاوى: تقدم عظيم في استخدام الألفاظ.

سونيا: الدنيا بتتطور يا برهومي.

جیمی الفونت : (یخرج زجاجة الخمر من جیبه) دی السبحه المودرن مارکة جیمی الفونت . .

طنطاوى: بتسبح بتقول عليها إيه يا فونت.

جیمی الفونت : بقول یا زمن زفت . . زفت . .

طنطاری: (ضاحكًا) لا صدقت . . درویش مودرن فعلا .

جيمى الفونت: المهم تكون صادق مع نفسك يا مسيو شيخ... والباقى طظ (يجرع من الزجاجة) طظ.. طظ.. طظ...

طنطاوى: (لسونيا) عندك هيئة إدارة ممتازة يا مدام سونيا.

سونيا : كلها تحت أمرك يا برهومي .

جدو: تكاليف بناء المسجد بلغت ميت ألف جنيه وتكاليف إنشاء مدرسة تحفيظ القرآن بلغت عشرين ألف جنيه.. ونفقات البروفات والتصوير والملابس الخاصة بالرواية الاستعراضية وصلت ميه وخمسين ألف جنيه.

سونیا : کل طلبات برهومی تجاب فورًا .

أونكل : ع العموم سيدنا حايشوف عرض عظيم يرضيه .

جدو : البروفات حاتكون مفاجأة .

جيمي الفونت : حاتشوف فن يا شيخ مسيو برهومي . . فن الخواجا فونت .

طنطاوى: إذن نأجل الكلام إلى ما بعد مشاهدة البروفات وإلى اللقاء غدًا . . إلى اللقاء مع الفن . . ومع الفونت .

(ستار)

## القصلالتالت

(صحواء . . ليل

نفس مكان الفصل الأول لكنه الآن يضج بالحياة والحركة . . أسلاك النور تمتد فى الفضاء والتوصيلات والأعمدة والكابلات فى كل مكان . . ولمبات كهربائية كبيرة تتدلى من الأعمدة وتحيل ليل الصحراء إلى بهار .

بالونات الزينة والبطيخ الأحمر والأزرق والأخضر تتدلى حول الخيام.

هناك ساحة فى وسط الخيام تستغل كبلاتوه للتصوير وحولها كاميرات سيهائية . لوحة بالتعليمات تتعلى من مكان ظاهر فى المسرح مكتوب عليها . . « ممنوع القبلات والأحضان » . . ولوحة أخرى مكتوب عليها . . « ممنوع هذه المشروبات : النبيذ والويسكى والبراندى والعرق والبيرة والزبيب – إمضاء الشيخ طنطاوى » ولوحة ثالثة مكتوب عليها . . « ممنوع لحم الخنزير » — إمضاء الشيخ طنطاوى .

فرقة سونيا المسرحية تشاهد فى الساحة فى حالة حركة دائبة ونشاط . . من الراقصات . . ماريكا وزازا ونانا وفانى وراشيل . . ومن الممثلين سوسو وبوسو ومبمى وجيمى . . المخرج توتو يقف عند إحدى الكاميرات . . ومكتب صغير يجلس عليه أونكل ، وإلى جواره العجوز «جدو» . . أغلب أفراد الفرقة يلبسون القبعات ويطلقون اللحى العجيبة والسوالف والشوارب ويرتدون القمصان المشجرة والبلوزات الحمراء والبنطلونات المحزقة .

أحمد وعبسى وزكريا وبحيى وإسماعيل وإدريس هم الآن عمال وموظفون وخدم . يظهرون بين وقت وآخر وهم يكنسون أو يلبون الطلبات أو يساعدون الأرتست على ارتداء وخلع ملابسهم أو يساعدون فى تغيير الديكور .

نسمع كلمة «ستاند باى » من المحرج . . ثم تضاء الكشافات ونرى رقصة «الحب والجنس» تقوم بها الراقصات مع الممثلين .

حركات تعبيرية تروى قصة الحب من أول نظرة إلى السلام فالكلام فاللقاء فالقبلة فالعناق فالفراش . . إلى أن يأتى المأذون في النهاية فيعقد العقد .

يدخل الشيخ طنطاوى فى ذراع سونيا فى بذلة بيضاء أنيقة وقد شذب شاربه وهندس سوالفه . . ما زال مهيب الطلعة . . سونيا فى ثوب أحمر طويل فاتن . . فهرها عربان . . وشعرها المذهب بموج على ظهرها .

تكون دخلته فى ذراع سونيا فى لحظة تبادل القبلة بين الراقص والراقصة فيهتف مستنكرًا وهو يخلع نفسه من ذراع سونيا ويتقدم إلى الراقص فيبعد شفتيه عن شفتى الراقصة).

- أنت ما قريتش اللايحة . . قلنا ممنوع القبلات . المخرج توتو : دى مش قبلة يا مسيو برهومى . . دى أداء تعبيرى . . فن . . باليه . . ابستراكت . . حاجة راقية غير المسخرة إللى انت عارفها .
  - ممنوع القبلات يعنى ممنوع القبلات.
  - سونیا : أوامر برهومی تمشی من غیر مناقشة یا توتو .
- لكن الرواية . . الحبكة . . التسلسل . . الرقصة بتعبر عن حكاية حب . . نظرة فابتسامة فموعد فلقاء فقبلة فعناق . .

حلقة بعد حلقة . . نعمل إيه فى حكاية القبلة . الشيخ طنطاوى . (بهرش رأسه) ممكن تكون قبلة فى الهوا بدون تلامس . . يعنى شبرين مسافة بين البنت والولد . (يشرح عمليًا على البنت والولد)

جیمی : (ساخوًا) یبعت لها بوسة فی الهوا . . افهم یا أستاذ . توتو : طیب حاضر . . أمرك . . ستاندبای . . نعید اللقطة حسب أوامر مسیو برهومی .

(يعود العرض من جديد إلى أن تصل القصة إلى العناق والفراش . . نرى حركات راقصة إيحائية تعبر عن الجنس . . يصرخ الشيخ طنطاوى في استنكار) .

جیمی الفونت : (الذی وضع تصمیم الرقصة) ده کوریوجرافی مودرن یا مسیو برهومی .

طنطاوی: من أی بیت سری استوردت الکوریوجرافی المودرن ده . جیمی الفونت : من باریس . . آخر صیحة فی بلویس . طنطاوی: دی صیحات من اختصاص بولیس الآداب فی کل مكان . . دى مخدرات مهربة فى علب ملبس مؤامرة على الجماهير . . تسول جنسى لصالح الشباك وجيب الست سونيا .

صمت تام

(تتبادل الفرقة النظرات)

(أونكل وجدو ينظران لبعضهما ، وللشيخ طنطاوى نظرات ارتياب) .

سونیا : (تقطع الصمت فی رقة) برهومی . . أنت أعصابك ثایرة النهاردة أكثر م اللازم . . أسأت الظن بالأولاد والبنات بدون داعی . . وضخمت المسائل . . والأمر أتفه من الثورة دی كلها . . مؤامرة وجهاهیر ومخدرات مهربة رتضحك) إیه ده . . أنت عندك النهاردة نوبة زعامیة خطیرة . . كریزة مش مفهومة . . الحكایة بسیطة أوی . . مكن تعدل فی الكوریوجرافی زی ما انت عاوز . . اعمل اللی یعجبك . . كلنا هنا فی خدمة مبادئك .

جيمى : (ساخرًا) ع العموم المأذون حايدخل فى آخر الرقصة ويعقد جواز البنت والولد . . يعنى الختام حايكون شرعى بإذن الله . . أستغفر الله إحنا ما نحبش الزنا .

أونكل: تمام كلام «جيمي الفونت» يا مسيو برهومي . . دى رقصة شرعية تنتهى بالنكاح الحلال إحنا لا ندعو

إلا إلى النكاح الحلال . . أستغفر الله .

طنطاوى: شيء جميل يا أونكل . . يا داعى إلى الشرع الحلال . . لكن أظن أنه حتى الأزواج لا يمارسون الوطء الحلال أمام أعين المتفرجين يا أونكل . . العملية ليست للعرض العلني . . إن الجمل وهو الحيوان الأعجم لا يستطيع أن يضاجع الناقة إلا في الظلام بعيدًا عن العيون . . ولو رأى عينًا تتلصص عليه يمتنع خجلاً . . وهو الحيوان .

أونكل: ولكن إحنا مش حيوانات يا مسيو برهومي.

طنطاوی: بالضبط یا أونكل وعشان كده لا نخجل ولا نستحی من أی شیء ، فنأكل بدون جوع ، ونشرب بدون عطش ، ونقتل بلا سبب ، ونفترس بلا غایة ، ونمارس ألوانا من الشذوذ لم تعرفها الطبیعة . . مش كده یا سوسو وبوسو وحنتوسو (یصرخ) مش كده یا حثالة أرصفة باریس ولندن وروما . . مش كده یا زبالة الأجناس البشریة .

سونیا : برهومی . . حبیبی . . ما تفورش دمك . . البرنامج رهن إشارتك . . ممكن تعدل فیه زی ما تحب . . مفیش لزوم للغضب .

طنطاوى: (فى غضب) طيب . . نشطب اللقطة الجنسية المباشرة . . . سونيا : اشطب اللقطة الجنسية ياتوتو . . الخركات المباشرة بس

هه . . مفهوم . . العرض تاني على بعضه .

توتو: ستاند بای . . کلا کیت .

(تعود الرقصة من بدايتها إلى أن يدخل المأذون فنرى شيخًا يدخل مثل الأراجوز بالعمة والجبة والقفطان . . بعد الحركات التى توحى بالعقد يخرج المأذون فتشيعه الفرقة بالصفير . . العريس يجرى خلفه وفى يده هراوة فى حركات إيمائية كأنما يريد أن ينتقم منه وكأنما يريد أن يهوى بها على رأسه انتقامًا للمصيبة التى أوقعه فيها) .

(ضحك مكتوم من الموجودين طول الوقت.

ثم صمت)

(الشيخ طنطاوي ينظر حوله نظرة صفراوية وهو يكز على أسنانه).

طنطاوى: مين اللي وضع الكوريوجرافي لرقصة المأذون الشرعي .

أونكل: جيمي الفونت.

طنطاوى: أظن المره دى مش حاتقول جايبه من باريس فهم هناك ما يعرفوش المأذون الشرعى يا فونت .

جيمي : لا . . المرة دى من تصميمي وتفكيري .

طنطاوی: برافو.. واضح أن لك رأيًا عظيمًا فى الجواز، وأنك بتحترم الشرع أوى.. وبتحب الحلال أوى أوى.

جيمى : أنا عارف إن رأيى مش حايعجبك . . لكن الحقيقة إن الجواز حاجة زفت . . شيء غير طبيعى . . شيء مقرف يا مولانا لا تؤاخذني . . أنا فنان ولا مجاملة في الفن

والصدق مع النفس مذهبی . . مش عاجبك ارفدنی . سونیا : (ف خبث ودلع) دی رقصة كومیك یا حبیبی . . فودفیل خفیف وافتكر انت معایا إن الجواز أحیانًا بیكون مهزلة . . وعشان كده ربنا شرع الطلاق . . والفن متعة ولو تحول إلى مواعظ یفقد وظیفته . . والفونت بینی وبینك معذور . . إسألنی أنا . . أصل مراته بتاكله علقة سخنة كل يوم . . والنهاردة باین علیه واكل كام شبشب رضحك) .

طنطاوی: (يهرش ذقنه مفكرًا) طيب . . موافق . . سجلوا الرقصة بشرط تخفيف لقطانت الكوميدی (ينظر إلى سونيا في ود) هيه . . راضيه عني ؟

سونیا : أوی . . ده انت بتتطور بسرعة مذهلة . . بقیت برهوم مودرن صحیح (ت**دنعه** فی صدره) سبقتنی یا مضروب .

طنطاوى: وإيه أخبار الملابس؟

سونيا : وصلت فى صناديقها من باريس . . موديلات تجنن . . آخر صيحة فى الجال والذوق .

– عاوز أشوفها .

رتصفق) یا أونكل أطلب عینات من الملابس عشان یشوفها
 مسیو برهومی .

أونكل : فورًا .

- (یختنی أونکل مسرعًا من باب خلنی) .

سونیا : بییرکاردان هو اللی رسم تصمیماتها بنفسه . . بالمناسبة . . هو صاحبی .

طنطاوى: تشرفنا.

سونیا : کل الموضات الجمیلة إللی بتجینا بتطلع من دماغ بییر کاردان . . . هو بالنسبة لنا إحنا یا ستات . . غرفة عملیات . .

طنطاوی: غرفة عملیات . . شیء عجیب . . یعنی إیه دی کان . سونیا : یعنی هیئة قیادة . . أركان حرب . . مارشال موضات . . كلمته أمر . . لما تشوف الفساتین طلعت فوق الركبة یبق تفهم علی طول إن فیه أمر صدر من مكتب بییركاردان فی باریس .

طنطاوى: أمر بتشليح كل النسوان.

سونيا : إيه البشاعة دى . . ليه كلماتك بشعة كده . . تشليح إيه وبتاع إيه . . الحكاية حكاية جال وفن وذوق وتجديد . . حاول تتخلص من الجلافة الريفية دى . . حاول تتطور شوية . . الدنيا بتجرى . . بتطير . . بتركب صواريخ . . وانت قاعد لسه على دكه الفقى بتقرا فى لوح أردواز . .

قوم من ع الدكة دى شوية روح بوتيك والاستريو والا ستريو والا نايت كلوب . . اتفرج ع الدنيا حواليك . . شوف جرى فيها إيه . .

طنطاوی: جری فیها ایه . .

(يدخل أونكل وعلى ذراعه عدة فساتين هفهافة مرصعة بنجوم من الترتر والألماظ).

(سونيا تأخذ أول فستان وتعرضه)

- شوف الموضات الحلوه . . ده مثلاً . . فستان رقصة الحب .

(ينظر طنطاوى مبهوتًا وهي تقلب أمامه الفستان . . ويتفحصه بعين حائرة) .

طنطاوی: ده فستان . . أنا مش فاهم إزای ممكن ده یكون فستان . . ده كله پتحط فی علبة كبریت . . ده لا يمكن يستر فرخة . . ثم إيه الفتحتين الكبار إللی ع الصدر دول . سونيا : ده عشان تطلع منهم الفكهة يا مسيو برهومی . . عشان يطل الرمان من علی شجرة . . الله . . ما تفهم بق . طنطاوی . آه . . عشان صدر الرقاصة . . يـ . . الله . . طيب ما ترقص عريانه وخلاص إيه لازمة الحشمة دى . . ليه الشرع واخد حده معاكوكده . . ليه الطبع الحنبلی ده . .

سونيا : أوه . . انت فظيع . . دى الصيحة الجديدة . . موضة سنة ١٩٨٣ .

طنطاوی: إللی رسمها بيير كاردان وصدرت بيها الأوامر من غرفة العمليات فی باريس عشان تنتشر عندنا . . ويطل الرمان من علی شجرة . . تعليات ستراتيجية عجيبة . . ده إيه التقدم العظيم ده دنا كنت نايم علی روحی صحيح ومش عارف إيه اللی بيجری فی الدنيا . . شیء جميل . . وإيه النجمة الألماظ دی .

سونیا : دی حاتکون هنا (تشیر إلی بطنها) .

طنطاوى: هيه . . على ميدان العتبه الخضراء . . لفت نظر إلى موطن الحير والبركة . . إلى كأس البمر حنة وصرة المسك . . حيث يجب أن تطوف العيون وتخشع القلوب والأبصار . شيء جميل (بصرخ فجأة) شيء منحط تمامًا . . شيء فاحش داعر سافل .

سونيا : بلاش مبالغات أرجوك . . أنا معاك أن العرى حايصدم العين فى الأول لكن بعد كده حايبتى مألوف وعادى لما ينتشر . . وبعدين حايبتى عرف وتقليد . . تمام زى حكاية المينى جيب والميكروجيب . . كل الستات بيلبسوه دلوقت محكم العادة المعتادة .

طنطاوى: بالضبط . . ودى خطة المارشال بييركاردان إللي رسمها فى غرفة العمليات . . إن الفحش عندنا يبتى العادة المعتادة .

سونيا: قصدك إيه.

طنطاوى: قصدى إنى بديت أشك فى إللى بيجرى حواليا . . دى مش حاجات بسيطة مما يمكن أن يسمى موضات وتقاليع . . إنما الأمر أخطر وأجل من ذلك بكثير .

سونيا : مش فاهمة . . معنى كلامك إنك مش حاتوافق .

طنطاوى: (فى جدية كأنما بدأ يكتشف أشياء) المره دى المسألة حاتعوز تفكير . تفكير جاد وخطير . وأفضل إن احنا نأجل البت فى الموضوع .

سونيا : أنا النهاردة مش قادرة أفهمك .

طنطاوى: ولا أنا قادر أفهم حاجة . . الظاهر إنى كنت فعلاً نايم وغرقان فى النوم . . وإنى بديت افتح عينى .

سونيا : وحيتأجل البت كتير.

طنطاوى: لا . . يمكن بكرة بيتضح كل شيء .

سونیا : (تربت علی خده فی دلع) وبین النهارده وبکره تتغیر حاجات کتیر . . زی العادة یا حبوبی . . بین یوم ولیلة بغیّرك . . وأطورك . .

طنطاوی: الظاهر أن التطور اليومين دول بيجری بسرعة أوی كما لو

كان وراه إيدين شيطانية.

سونیا : ایدین ملائکیة وحیاتك (تلوح له بیدیها) تفتکر دی ایدین شطان ؟

طنطاوی: جایز شیطان لابس جوانتی حریر.

سونيا : شيطان بالحلاوة دى !

طنطاوی: هو دایما بیکون حلو.

سونيا : ومين يقدر يقاومه وهو بالحلاوة دى .

طنطاوى: اللي حايكشف عن وجهه القناع.

سونيا : حاتقدر تكشف عن وجهى القناع .

طنطاوی: لو فقت لنفسی وصحیت صحو تام.

سونیا : کل ده ومش صاحی.

طنطاوی: أبدًا . أنا دایخ . دماغی بتلف من یوم دخلت الأسلاك والما كینات والأضواء الأرض البكر اللی كنت عایش فیها . . مش قادر أخلا بنفسی لحظة . . دوشة الماكینات دخلت جوه دماغی . . نور الكشافات غشی بصری . . (یغطی علی عینیه) .

سونیا : حط إیدك علی خدی . . (تأخذ أنامله وتمورها علی خدها) . . شفت فیه قناع . . . وهنا فیه قناع . . (تقبل أنامله فی حنان) أنا بحبك من غیر أقنعة یا برهومی .

طنطاوی: (یفتح عینیه بحملق فیها وفی أضواء الکشافات یترنح) النور . . طفوا النور . . کل شیء هنا صناعی . . کل شیء مفتعل . . کل شیء کلب . . کل شیء کلب . .

سونیا : ما لك . . جرى لك إیه . (پنهالك طنطاوی علی كرسی)

سونيا : إنت محتاج للراحة يا حبوبى . . إنت بتجهد نفسك كتير عشاننا . . روح أودتك مدد لك شوية . . وحاجيلك بعد لحظة .

طنطاوى: (يقف يمسح على عينيه) لا متشكر.. الحمد لله فقت .. كان دوارًا عابرًا.. نستمر فى العمل.. مفيش وقت للدلع .. قولى لى .. إيه أخبار رقصة الحرب .. وصلت الأسلحة المطلوبة.

سونيا : ما تشغلش بالك الأسلحة فى الطريق وحاتوصل حالاً . طنطاوى: طيب . . أنا حاروح فى مكتبى أستناها . . واستمروا انتوا فى عملكم (يلتفت إلى الأولاد والبنات) وحانبه مرة تانية . . إياك حد يخالف اللوائح . . المرة دى مش حا سامح حد .

(بمجرد خروجه نرى المسرح يتحول إلى شقلباظات . . وكل ممثل يقفز في بهلوانية وكل ولد يحتضن بنتًا ليقبلها فرحًا بزوال الكابوس) .

خرج الكابوس.

ما تعالوا نبوس .

(نرى الشيخ إدريس يرقص ويتنطط مع ماريكا وهي تغني).

شیخ إدریس یا شیخ إدریس

ياسلطان الملاحيس

شیخ إدریس یا شیخ إدریس

يا سلطان الملاحيس

(جيمى الفونت بخرج زجاجة شمبانيا من تحت الكوسى ويقيمها على الله دفعة واحدة).

توتو: (فى دهشة لجيمى) إيه ده يا فونت . . ممنوع . . اقرأ اللايحة (يشير إلى لائحة الممنوعات) .

- دى شمبانيا وحياتك . . غير وارده فى لائحة الممنوعات . . الدرويش الكرودية ما سمعش عن الشمبانيا ولا يعرفش إنها منكر .

(جيمى يترنح بعد أن النهم الزجاجة ويخرج من المسرح وهو يغنى ويدندن بفمه).

جيمى: (يدندن).

بيجوزونا ليه .

ترللا . . ليه .

ترللا . . ليه .

(يصطدم بأونكل فيغمغم)

جیمی : ما تفرحش یا أونکل . . یومك جای . . عقبال ما نمشی فی جوازتك .

(زازا الراقصة الفيديت تدور حول نفسها في مهارة).

زازا : إيه رأيك في الرقصة دى يا فونت

جيمي : برافو . . magnifique

زازا : عجبتك

جيمي : قمر .

زازا : تتجوزنی یا فونتوتو.

جيمى : وليه الأذية دى . . ما تخليكي كده قمر بدال ما اتجوزك وتبقى غراب .

- غراب غراب مرة واحدة ؟

- وحِدًّایه وبومه کمان . . تحولات فزیولوجیة جوازیة .

مش بتحبنی یا فونتوتو.

شفوی مع إيقاف التنفيذ . . وردة فی جنينه . . كل واحد فی حاله . . مش عاوز أقطف . . لو قطفتك حاحطك فی زهرية وبعدين أرميكی فی الزبالة . . كان لازمته إيه يا فونتوتو . . ماكنا كويسين يا فونتوتو .

شربات یا فونتوتو .

(يخرج جيمي من المسرح وهو يدندن).

بيجوزونا ليه . . .

ترللا ليه . . .

ترللا ليه . . .

(نرى أونكل وجدو وسونيا يسعى كل منهم إلى الآخر ويقفون متقاربين . . رءوسهم تميل على أنهم يتهامسون بعضها البعض في شكل يدل على أنهم يتهامسون بأسرار) .

( يخفت ضجة المسرح خواهم . وتظهر الرءوس الثلاثة في دائرة ضوء واحدة ونسمع الوشوشة) .

جدو: (لسونيا) إيه أخبار مولانا الشيخ.

ما تطمنش آوی . . لكن البدایة مش بطالة . . سمعتوه قدامكم بیصرح بالقبلات بشرط أنها تكون فی الهوا ، وبالرقص الجنسی بشرط أنه یكون غیر مباشر ، وبالكومیدیا إللی ضربنا فیها المأذون بالنبوت ، وامبارح أخذت منه تصریح بشرب البیرة ، علی أنها مشروب خفیف غیر مسكر ینشط الكبد ویدر البول . . والبقیة تأتی . . ولما تبتدی التنازلات ما بتنتیش ، وإذا نجحت الحطة زی ما رسمناها ، مولانا الشیخ حایبقی بعد آیام مفتی الخطة زی ما رسمناها ، مولانا الشیخ حایبقی بعد آیام مفتی الخصرة الحلال والوط و ریضحك

الثلاثة على كلمة الوطء كما تنطقها سونيا) ، والوطء الحلال الزلال . . ويحول البلد إلى شعب محلول مغمى عليه . . وباقى العملية حاتكون أسهل علينا من قزقزة اللب . . حانستولى على الأرض والناس زى ما بنعبى فراخ مغمى عليها فى أقفاص .

لكن زى ما قلت لكو. . لسه مش مطمنة أوى فهو بدا يشك ويفوق ويصحى ويفتح عينيه . . ودى حاجات ما يصحش تحصل .

جدو: البركة فيكي . -

أونكل : وفى العرقسوس اللي فيه أفيون L.S.D. وارد فرنسا .

سونيا : لازم نزود الجرعات ونستعمل كميّات أكبر من الأفيون .

جدو : سبقناكي في مراعات المسألة دى .

سونيا : وإيه أخبار الدراويش.

أونكل: الشيخ إدريس غرق فى المهلبية ، والباقى فى حالة ذهول بيتحركوا زى الآلات . . والشيخ عيسى مبوز ومكشر وفى حال صيام مستمر ، وآخر أخباره أنه دخل المسجد واعتكف وضرب ماريكا لما دخلت له بالأكل .

سونيا : سيبوه فى حاله وراقبوه من بعيد .

أونكل: أنا عندى تحذير أهم.

سونيا : إيه هو .

أونكل : جيمي الفونت ما يصحش يعرف حرف من الخطة .

جدو مؤكد . . ده راجل مجنون . . فنان منحل لحسابه الخاص لا يمكن يشتغل لحساب حد . . رجل بيسكر لمزاجه الشخصي . . فونت . . لا بيههه جد ولا بتهمه حاجة . . كل همه أنه يكون صادقًا مَنْ الْمُنْ اللَّهُ الللَّهُ اللَّهُ الل

أونكل: وعشان كده نسيبه لنفستُه :

سونیا : ویبتی أفضل لو نسکره حبه زیادة عشان بنام علی روحه أکثر ، ویریحنا من حکایة صدق نفسه مع نفسه .

أونكل: البركة ف جدو.

جدو : والكورفواسييه نابليون إللي عمره سبعين سنة يا متر .

سونيا : لازم نشتغل بسرعة ونسبق المفاجآت . . افتحوا عينيكم كويس . . ساعة انصفر قربت .

(تنطفئ دائرة الضوء التى تسبح فيها الرءوس الثلاثة . . ونراهم يتصافحون ويتفرقون) .

(سونیا تتمدد علی شیزلونج فی مقدمة المسرح وتشعل سیجارة وتدخن) (سوسو وبوسو شابان مختثان فی عمق المسرح یتمرنان علی الرقص، شعورهما مرسلة حتی الکتفین، فی شفاههما روج وفی خدودهما أحمر، ولبسهما فاقع، وحركاتهما أنثویة).

(زكريا يكنس الأرض).

(سوسو وبوسو ينظران إلى قامته الفارهة وإلى تكوينه العضلى الرجولى ويفكر كلاهما في نفس الشيء في وقت واحد).

بوسو · زکریا . . تعال سرح لی شعری .

سوسو: زكريا.. تعال قلعني البلوزة.

(زكريا يساعد سوسو فى خلع البلوزة).

سوسو : (يعطيه بونبونة في فمه) دلك لي ضهري.

(زكريا يدلك ظهره).

سوسو: دلك هنا.. الروماتزم هنا.

(زكريا يدلك له المكان الذى أشار إليه).

سوسو: لا دلك هنا.. الروماتزم هنا.

(زكريا يدلك له كها أراد).

سوسو: عدّى على بالليل.. عندى لك هدية.

بوسو: زکریا.. سرح لی شعری.

(زكريا يتحول إلى بوسو ليمشط له شعره الطويل الذهبي)

بوسو: زكريا.. تحب الملبس.

زكريا: متشكر.

(يدخل الشيخ طنطاوى . . يفهم ما يجرى بنظرة واحدة)

طنطاوى: (يهتف في حدة) زكريا .

(ينتفض زكريا ويقع المشط الذي كان يسرح به شعر بوسو من يده) ـ (سونيا تنظر إلى ما يجرى بعين ناعسة) .

طنطاوى: بتعمل إيه.

زكريا: (في براءة) بسرح شعر بوسو.

طنطاوى: روح أودتك فورًا.

زكريا: حاضر.

(ينصرف زكريا ويتبعد سوسو وبوسو ولا يبقى على المسرح إلا الشيخ طنطاوى وسونيا).

(الشيخ طنطاوي يتلفت حوله في ارتياب).

طنطاوى: أنا مش فاهم إه اللى بيحصل حواليه فى الماخور ده . . ومش فاهم إيه اللى بيحصل لى أناكان . . شاعر بحيويتى بتتسرب منى كأنى إناء فيه آلاف الخروق .

(يتهالك متعبًا على كرسى بجوار سونيا وهو يمسك رأسه بين يديه . . سونيا . تأخذ رأسه على صدرها وتربت عليه في حنان) .

سونيا : برهومى حبيبى . . إنت بيتهيأ لك حاجات مالهاش وجود . . إنت مجهد . . ومحتاج لراحة وَدى كل الحكاية . . خد لك شفطة منعشة من شراب العرقسوس اللي بتحبه .

طنطاوى: لا . . بلاش . . بيتعب لى أمعائى .

سونيا : مش معقول . . ده أحسن علاج للأمعاء . . ده موصوف لأمراض المعدة والأمعاء . . خد . . طنطاوى: لا . . أرجوكي (يبعد يدها) .

سونیا : زی ما انت عاوز.

تعود فتربت على رأسه فى حنان).

سونيا : مش بتحس بالسعادة والفرح وإنت بتشوف الأرض الخراب إللي كنت ساكنها والمزابل إللي كنت بتنام فيها دخلتها المدنية ودخلها النور والمية والتلفون والتلفزيون والراديو والكتب والمجلات وموسيقي هايدن وموزار.

طنطاوى: أوى . . ومزيكة تشاتشاتشا والأفلام العريانة والسجاير المحشية بحشيش الماريجوانا والانحلال والشذوذ وغنوة أوه كريستين . Une autre fois

سونیا : (تضربه علی خده وتقبله) إزای کشفت کل الحاجات دی یا برهومی یا عفریت .

طنطاوى: دى حاجات انتشرت أوى وما بقتش محتاجة لمكتشفين. وكالعادة المسائل اللذيذة بتروج لنفسها بسرعة والعملة الرديئة بتطرد العملة الجيدة من السوق. . دى قوانين الدنيا المنحطة بتاعتنا .

سونیا : وإنت إیه مزعلك من الحاجات دی . . ما تسیب الشعب يتمتع ويفرفش بعد طول حرمان . . ده حقه . . هو النعيم كفر؟

طنطاوى: الخمرة والمخدرات والحشيش مش نعيم . . ده هروب من النعيم ومن الشقا سوا . . ومعناه إن احنا ندى ضهرنا للمشاكل وننام .

سونيا : ما تسيبهم يناموا شوية . . إيه الضرر ؟

طنطاوى: حايناموا طوّالى نومة أهل الكهف ويصحوا بإذن الله على خراب أسوأ من كل خراب فات .

سونيا : أما انت متشائم صحيح . . وليه تنسى الجوانب المضيئة . . ليه تنسى إن احنا جبنا لكو العلم .

طنطاوی: (ساخرًا) جبتو لنا العلم . . أی علم . . جبتو لنا التلفزیون والطیارة والصاروخ والعقل الألکترونی . . نشتریه منکم وما نعرفش نعمل زیه . . ده یبتی علم . . ولا نص علم ولا ربع علم . . دی سریقة . . ادیتونا قشرة علم وأخدتم منا کل البکارة وکل الخامات وکل الکنوز . . سرقتونا ونهبتونا والآخر بعثو لنا سوس الانحلال یأکل فی أبداننا حتی النخاع (یهب صارعًا من رقدته) انتوا . . ضیعتونا . . احنا ضعنا . . ضعنا . . أنا عاوز خرابتی القدیمة . . مش عاوز منکو حاجة .

سونيا : إنت حاترجع لفلسفتك التخريفية بتاع زمان والكلام النظرى الفارغ إللي لا يودي ولا يجيب . . خد إشرب . .

ده علاجك من مرض أينشتين بتاعك.

طنطاوى: مش حاشرب.

سونيا : لازم تشرب عشان تفوق لعملك ومسئولياتك . . إنت ناسى إنك بقيت أهم راجل فى القيادة الفكرية والدينية لبلدك (تقرب منه الكأس فيتزعها ويلقى بها على الأرض) .

طنطاوى: (في تمرد) سيبيني لوحدي.

سونيا: (في حنان) جرى لك إيه. . إتجننت.

طنطاوى: لا . . عقلت . . فقت .

سونيا : وحاتعمل إيه.

طنطاری: حارجّع کل شیء لأصله . . حاکرشکم کلکم وارجع لخرابتی القدیمة .

سونیا : ما عادش ممکن . . عجلة التطور بتمشی فی اتجاه واحد ومش ممکن حاتقدر ترجع بیها لورا . . مش حاتقدر ترفض العلم .

طنطاوى: أنا مش حارفض العلم . . أنا حارفض التوظيف السيىء للعلم . . العلم سلاح محايد . . ممكن يبقى قنبلة ذرية مهلكة . . وممكن يبقى طاقة خيرة تنور مدينة . . ممكن الراديو يثقف ويعلم ويفيد ، وممكن يضيع ويتلف ويخرب . . ممكن يذيع الصدق وممكن يذيع الكذب .

أنا حاخد العلم وأوظفه على مرادى ولفايدتى ولخيرى وخير الناس ، وحاخد العلم من منبعه مش من إيديكم عشان آخد كل العلم مش نص العلم وربع العلم وقشرة علم . سونيا : (مادة يدها) وتنسى الإيد إللى ادتك كل أموالى وثرواتى تصرفها على مبادئك وأفكارك .

طنطاوى: ده الشيء إللي مش قادر أفهمه.

- ولغاية دلوقت بتاخد وتصرف زى ما انت عاوز.

- وده هو الشيء المريب.

- بتقول المريب.

- لأن الكرم الحاتمى إللى يبدو فى ظاهره خير، سرعان ما يتحول عند التنفيذ إلى شر مستطير، وتدمير للأرواح والنفوس، وكأن فيه إيدين خفية بتحوله بلمسة سحرية من ترياق. إلى سم . . مش عارف ازاى . . فيه حاجات مش فاهمها (يقفز من كوميه) لابد من العمل . . لابد من كشف الإيدين المجرمة إللى بتخرب كل شيء .

سونيا : (تهب من رقدتها عند سماع كلماته مخاطبة نفسها بنبرة ذات معنى) عندك حق . . لا بد من العمل بسرعة . . قبل ما يسرقنا الوقت . (تتفض واقفة) .

سونيا : حاسبقك عشان أجهز لاستعراض الحب والحرب.

(تخرج سونيا مسرعة).

(الشيخ طنطاوى يذرع المسرح ذهابًا وجيئة في خطوات عصبية ثم ينادى فجأة) .

- زکریا . . زکریا . .

(يدخل زكريا)

طنطاوی: اجمع لی أصحابنا كلهم فورًا . . روح قوام مستنی إیه .

زكريا : الشيخ عيسى معتكف في المسجد ومش عاوز يطلع منه

طنطاوى: قله له يحضر فورًا . . قل له إنى بأمره .

(يخرج زكريا ويعود طنطاوى إلى ذرع المسرح ذهابًا وجيئة).

طنطاوى: (بكلم نفسه) عاوز أعرف إيه إللى بيجرى فى الخفاء ، عاوز أعرف الإيدين إللى بتخرب ، ولحساب مين بتخرب . فيه إغراق متعمد لكل شيء فى الجنس والعرى والمخدرات والهزل . كل محاولة للبناء بتنقلب لمشروع للهدم . كل واحد له وشين ، ابتسامة ع الفم وخنجر فى الضهر . مبادئ على اللسان ، وخراب فى القلب . . إيمان فى مبادئ على اللسان ، وخراب فى القلب . . إيمان فى العلانية ، وكفر بكل شيء فى السر . . الكل بيحاول يخطف لذة سريعة بأى ثمن . . حتى أنا . . بتغير شوية شوية من غير ما أحس . . حتى أنا . . أترهل . . واتحلل كثمرة طيبة تتعفن .

(يدخل الدراويش)

طنطاوی: (یتأکد من وجودهم جمیعًا) أحمد وزکریا ویحیی و إسماعیل و اور اسماعیل و اور یس مین اوریس .

زكريا: نايم سكران في البار.

طنطاوى: بقى واحد منهم . . كان بيمثل على نفسه الإيمان . . سيبوه . .

(يدخل عيسى كتيبًا عابسًا كبومة فى خرابة ، نظراته حادة كأنها خناجر مصوبة إلى صدر الشيخ طنطاوى).

طنطاوى: أنا عارف إنت عاوز تقول إيه . . لكل كان لازم ننزل للدنيا ونعيشها على حقيقتها قبل ما نحاول نعمل أى حاجة .

عيسى : وقدرت تعمل أى حاجة . . كلنا غرقنا فى العسل اللزج وبلعتنا دوامة الرمال الناعمة .

طنطاوى: لسه قدامنا فرصة . . دوامة الرمال الناعمة ماطمستش على أبصارنا . . لسه بنشوف .

عيسى: بنشوف إيه؟

إحنا أبناء البلد . . الأرض أرضنا والوطن وطننا بنخدم على الترابيزات ، ونقدم الطلبات ونكنس البلاط وخيرات . بلدنا وثرواتها في إيدين سونيا وتوتو وسوسو وبوسو وجدو

وأونكل . . دخل علينا الخواجات قدمنا لهم أرضنا وبعدين حفرناها بإيدينا وقدمنا لهم كنوزها . . وأسوأ من ده كله (بنغمة ذات معنى لزكريا) بنأدى لهم خدمات تانية فى السر . . لسوسو وبوسو .

زكريا : قسمًا بالله . . ما رضيت أعمل الحكاية دى أبدًا ورجعت لهم فلوسهم . .

قسمًا بالله ما خطر على بالى إنهم كانوا عايزين منى الحكاية دى .

طنطاوى: كانوا عايزين يدمروك.

زكريا: فهمت كل حاجة الآخر لكن ماقدرتش أتكلم.

طنطاوى: (لإسماعيل) والمخدرات اللي سمعت إنهم بيوزعوها عليكم .

اسماعيل: والمصحف الشريف كنا بناخدها منهم ونرميها فى الصحراء.

طنطاوى: وليه كنت بتاخدها وليه ما تقولشي.

اسماعيل: خفت منك.

طنطاوى: مين إللي كان بيوزعها عليكم.

يحيى : فيتوريو مساعد المخرج توتو .

طنطاوى: الأيطالي الصعلوك.. وكان بيقول لك إيه.

يحيى : كان بيقول لى . . ابسط نفسك وابسط أصحابك

وفرفش . . إنتو بتقولو عندكو . . قول يا باسط وطول ما انت حى رزقك جاى .

طنطاوی: كان . . بيفتی فی الدين ، ويصوره لنا علی أنه دين مخدرات وحشيش ، وقول يا باسط ، وطول ما انت حی رزقك جای . . رزقك جای منين . . من المقشة وهو واخد البلد نهيبه وعاوز ينومك بالمخدرات عشان تنام علی حقوقك . . مسيو فيتوريو الصعلوك بيفقهنا فی الدين . . لكن الحقيقة الحكاية مش فيتوريو . . فيتوريو مجرد دمية ومن وراها خيوط بتحركها ، وإيدين كبری خفية بتحرك الحيوط وأدمغة جهنمية تحرك الإيدين .

مين هم أصحاب الأدمغة.

هو ده السؤال ـ

عيسى: لا بد من كشف كل شيء.

أحمد : لابد من العمل فورًا .

طنطاوی: اخرجوا کلکم . . وکل واحد یکون عین ومرصاد . . لازم نعرف کل شیء .

(نخوجون) .

(طنطاوی وحده . . يذرع المسرح فی عصبية . . يعصريديه . . يخبط على جبهته) . طنطاوى: حتى أنا . . اترهل . . واتخلل . . كثمرة تتعفن . . وافقد العزم والهمة والنقاء والوضوح حتى أنا . . (يدخل جيمي الفونت يترنح من السكر ويدندن) .

جيمي : بيجوزونا ليه . .

ترللا ليه . .

ترللا ليه . .

بيجوزونا ليه . .

ترللا ليه . .

ترللا ليه . .

الموت .

(یکتشف وجود طنطاوی).

جيمى : (يقبل عليه بابتسامة لطيفة بريئة) إنت هنا يا مسيو برهومى . .

(عديده ويربت على كتفه) أنا بحبك يا شيخ مسيو برهومى . .

وعاوز أقولك حاجة . إنت أصلك رّاجل طيب . .

وابن حلال مصنى . . وأنا قلبى عليك يا شيخ مسيو برهومى . . أوعى تحضر الرقصة الجديدة إللى بيجهزوها . برهومى . . أوعى تحضر الرقصة الجديدة إللى بيجهزوها . طنطاوى : (يتبقظ فضوله) رقصة الحب والحرب . . ليه يا فونت . جيمى : هم بيقولولك البنادق الرشاشة حاترش ملبس وبونبون وشوكولاته على المتفرجين . . بيضحكوا عليك يا درويش ياكرودية . . البنادق حاترش ذخيرة حية . . حاترش ياكرودية . . البنادق حاترش ذخيرة حية . . حاترش

طنطاوی: (یقفز علیه ویمسکه من کتفیه) فونت. . فوق لنفسك کویس. . اصحی . . إنت عارف بتقول إیه . . الكلام اللی بتقوله ده خطیر . . خطیر .

جيمى : أنا شفت صناديق الذخيرة الحية بعينى يا شيخ مسيو برهومى . . وشفتهم بيتمرنوا عليها فى الجبل . . أنا سكران صحيح لكن فونت . . وطول عمرى كنت راجل فونت . . بس الجواز هو إللى ضيع أخوك الفونت . . أوعى تتجوز (يعود إلى الدندنة والغناء) .

كانوا بيجوزونا ليه

ترللا ترللا . . ليه

ترللا نرللا . . ليه

طنطاوى: (بمسك جيمى ويهزه) فونت . . أرجوك . . فوق لنفسك . . فتح عينيك . . شفت إيه بالضبط .

جيمى: ترللا ترللا.. ليه

ترللا ترللا . . ليه

النهاردة حایاخدوا البلد کلها یا شیخ مسیو برهومی حایاخدوها وهی سکرانة مغمی علیها.

ترللا ليه . .

ترللا ليه . .

(یخرج وہو بترنح کما دخل) .

طنطاوی: فهمت . فهمت کل شیء . فهمت الحکایة کلها . من أول طرقة علی باب کوخی فی الصحرا لما دخلت الفتنة وقالت لی إن معاها المال والمدنیة والنور ، وإنها تضع تحت تصرفی کل شیء . وإنها بتحبنی . واستدرجتنی بکل السبل لتخلعنی من مکانی . لتستولی علی مکانی و بعدین تستولی علی الأرض مکانی . لتستولی علی مکانی و بعدین تستولی علی الأرض وسکانها ، و بعدین تستولی علی العقول والقلوب والضهایر والذم ، و بعدین تجعل منا خدم و عبید و جواری و شعب علول مغمی علیه فی البارات والسکك .

لكن مفيش حد حاياخد شبر من أرضى. حاسبقهم كلهم إلى النهاية.

(يخرج كالقذيفة . . على حين يظلم المسرح تدريجيًا) .

(فترة إظلام قصيرة تعقبها موسيق تصويرية عسكرية ثم تلقى بقعة ضوء وسط الظلام على وجوه سونيا وأونكل وجدو وتوتو كأنها وجوه شياطين تلمع على أرضية مظلمة وقد مالت بعضها على بعض فى وشوشة). سونيا : المدافع البلاستيك اللى كنا بنتمرن عليها فى البروفات حانستبدلها الليلة بالمدافع الحقيقية . . الرشاشات اللعب

بالرشاشات الحقيقية . . وبمب الأطفال بقنابل يدوية . . ومسدسات الحسوت بمسدسات موت .

ولما أشد الوردة من صدرى عشان أرميها تحية للبطل تضربوا النار كلكم فى وقت واحد . . وانتو عارفين حاتضربوا على مين .

والباقي سهل

مش حاتلاقوا مقاومة . . البلد كلها سكرانة من الشرب والرقص والغنا ونايمة على ضهرها من اللذات والإفراط والبلادة والتفاهة .

(تنطفئ بقعة الضوء لتضىء بقعة أخرى فى الجانب المقابل من المسرح حيث وجوه الشيخ طنطاوى وزكريا ويحبى وإسماعيل وعيسى وأحمد وقد مالت بعضها على بعض فى وشوشة).

عيسى: خدعونا

طنطاوى: لبسونا خرقة المجذوب وقالو لنا هي الدين.

عيسى : غرقونا في الدعارة وقالو هي الفن.

إسماعيل: علمونا الإلحاد وقالو هو العلم.

أحمد : فرقونا بالصراع الطبقي وقالوا هو العدالة الاجتماعية .

عيسى : وخدوا أرضنا .

يحيى : وخيراتنا .

إسماعيل: وكنوزنا.

عیسی : وثرواتنا .

أحمد : والآخر حايقتلونا .

طنطاوى: حانقتلهم قبل ما يقتلونا.

(تنطفي بقعة الضوء).

(وبعد فترة ظلام قصيرة يضاء المسرح تدريجيًا على مارش عسكرى ونرى الفرقة الاستعراضية كاملة).

(الراقصون والراقصات بملابس حرب عسكرية يضعون المدافع الرشاشة في خصورهم ويتحركون في تشكيلات ) .

(أونكل يكمن وراء تبة مدفع).

(المخرج توتو فى ثياب مارشال).

(جلو في عربة مصفحة).

(سونیا فی فستان أزرق طویل فی صدرها وردة)

(الوحيد فى الفرقة الذى يبدو خارج اللوحة وخارج الجو هو جيمى الفونت الذى يحتضن زجاجته فى ركن ويسكر . . وقد أعطى ظهره لكل شىء ) . (الكل فى انتظار البطل) .

(يغنون فى كورس مع حركة التشكيلات أغنية قصيرة تعبر عن انتظارهم للبطل ، وإنه قادم ومعه المجد والنصر . . وإنهم يتحرقون شوقًا للقائه) . (يدخل البطل . . قائد عسكرى أوربى فى ثياب حرب أوربية يجرجر وراءه سربًا من الأسرَى الآميويين) .

(تهليل صاخب . . تتقدم منه سونيا لتناوله الوردة . قبل أن تمد يدها لتنزع الوردة وتلقيها إليه يظهر الدراويش كالعفاريت كأنما انشقت عنهم .

الأرض . . ف ثياب مقاتلين عرب وفرسان عرب وفي أيديهم المدافع الرشاشة .

الشيخ طنطاوى : (صارخًا) ارفعوا الأيدى .

(يتجمد الكل في أماكنهم من المفاجأة ويرفعون أيديهم تمتد يد أونكل إلى مدفعه فيعاجله طنطاوي بوابل من الرصاص يرديه قتيلاً).

طنطاوى: (في هدوء) وقع الحافر فيما حفر.

كنتم تحفرون لنا طول الوقت.

وكانت معاولكم مزوقة جميلة.

مرة اسمها العلم.

ومرة اسمها التمدن.

ومرة اسمها الفن.

ومرة اسمها الفلسفات المستوردة والأفكار العصرية .

ومرة اسمها المخدرات والموضات وأدوات الزينة .

ولكن اليوم يتغير كل شيء.

(في صوت بارد قاطع) خدوهم وقيدوهم ورحلوهم لبلادهم قبل الفجر . . اليوم تعود إلينا بلادنا وأرضنا وشخصيتنا .

(بهجم عليهم الدراويش ويسوقونهم فى طابور إلى خارج المسرح . . يظهر الشيخ إدريس . . كان محتبئًا مع جدو فى العربة المصفحة . . يراه الشيخ طنطاوى فيشير نحوه ) .

- والشيخ إدريس . . معاهم . . ده منهم .

(يسوقون الشيخ إدريس إلى الحارج والبندقية فى ظهره وهو يولول فزعًا) (شيئًا فشيئًا يخلو المسرح . . لا يبقى إلا جيمى الفونت وعيسى وطنطاوى) (يذهب عيسى إلى الفونت ليسوقه إلى الخارج مع أصحابه . ولكن طنطاوى يعترض طريقه) .

طنطاوی: سیبه . . ده معانا .

عیسی : ده کافر.

طنطاوى: بل هو من أهل الصدق.

عیسی : ده ما یعرفش ربنا .

طنطاوى: حايعرفه . . من يتوسل بالصدق يصل .

عیسی : ده سکیر

طنطاوی: ده کان صاحی آکتر م<sup>ائ</sup> (یذهب الیه ویحتضنه) ، إن حربه حربنا وقضیته قضیتنا . . کلنا نطلب الحق بکل سبیل .

عيسى: بالخمرة.

طنطاوى: (يحتضنه) لا . . غدًا يسكر بخمرنا . . خمر الإيمان ويلبس ثيابنا . . الثياب التي دخل بها طارق بن زياد أسبانيا ، ودخل بها خالد بن الوليد اليرموك . . لن يجردنا أحد من تلك الثياب بعد اليوم .

لقد بدأت النهاية وغدًا نغير كل شيء.

(ينزل ستار الختام على دمدمة الرصاص والمدافع الرشاشة وعلى مارش الانتصار).

1994 / 0444		رقم الإيداع
ISBN	977 - 02 - 4150 - 4	الترقيم الدولى
(.	۱/۹۳/۷۳ ابع دار المعارف (ج.م.ع.	طبع بمطا

## هذه المجموعة

تعرص دار المعارف دائها على تقديم الأعهال الكاملة لكبار المفكرين والأدباء. والدكتور مصطفى محمود والمند من هؤلاء الذين أخلصوا للقلم. فأثرى ساحة الفكر والعلم .. اوطرق أبوابًا جديدة لم تفتح من قبل . فتنوع إنتاجه بين القصة والرواية والمسرحية وأدب الرحلات . إلى جانب تلك الؤلفات التي تحفل بالنظرات المعاصرة للفكر الديني والمقادنة من الحدل

وقد امتد من الخليج إلى المحيط كما نرجمت بعض القراء العرب من الخليج إلى المحيط كما نرجمت بعض أعاله إلى اللغات الأجنبية شاهدة بقدرته على العطاء

المتماز المتنوع.



10401